

PERLEMBAGAAN

**Parti Pesaka Bumiputera Bersatu
Sarawak
(PBB)
(PINDAAN SEHINGGA 7 JUN, 2023)**

Dikeluarkan oleh
Jawatankuasa Perlembagaan PBB, Jalan Bako
93050 Kuching
Sarawak

Nombor Pendaftaran Parti: 30/73 (Sarawak)

PERLEMBAGAAN PARTI PESAKA BUMIPUTERA BERSATU SARAWAK (PBB)

ARTIKEL	KANDUNGAN	MUKASURAT
Artikel 1:	Nama	1
Artikel 2:	Alamat Berdaftar	1
Artikel 3:	Lambang	1 - 2
Artikel 4:	Lencana	2
Artikel 5:	Bendera	2 - 3
Artikel 6:	Cogan Kata dan Seruan	3
Artikel 7:	Tujuan-Tujuan dan Kuasa-Kuasa	3 - 4
Artikel 8:	Kelayakan Keahlian	4
Artikel 9:	Permohonan Keahlian	5
Artikel 10:	Penerimaan Keahlian	5 - 6
Artikel 11:	Tanggungjawab dan Hak Ahli	6 - 8
Artikel 12:	Pemberhentian Keahlian	8 - 9
Artikel 13:	Perhimpunan Agung	9 - 13
Artikel 14:	Majlis Tertinggi	14 - 18
Artikel 15:	Caucus Parlimen (<i>Parliamentary Caucus</i>)	18 - 20
Artikel 16:	Tanggungjawab Pemegang-pemegang Jawatan	20 - 23
Artikel 17:	Penubuhan, Pentadbiran dan Pengurusan Cawangan	23 - 26
Artikel 17A:	Pendaftaran Cawangan dan Ranting	26
Artikel 18:	Jawatankuasa Cawangan	26 - 33
Artikel 19:	Penubuhan, Pentadbiran dan Pengurusan Ranting-Ranting	33 - 35
Artikel 20:	Jawatankuasa Ranting	35 - 40
Artikel 21:	Pelantikan Perwakilan	40
Artikel 22:	Pergerakan Pemuda	40
Artikel 23:	Pergerakan Wanita	41
Artikel 23A:	Pergerakan Belia PBB	41 - 42
Artikel 24:	Syarat Menjadi Calon	42
Artikel 25:	Disiplin Parti	42 - 45
Artikel 26:	Buku Daftar Keahlian	45 - 46
Artikel 27:	Kad Keahlian	46
Artikel 28:	Sumber Kewangan	46
Artikel 29:	Yuran	47
Artikel 30:	Peruntukan Kewangan	47 - 48
Artikel 31:	Harta Tak Alih	49 - 50
Artikel 32:	Audit	50
Artikel 33:	Peraturan-Peraturan	50
Artikel 34:	Pindaan Perlembagaan	51
Artikel 35:	Pungutan Suara (Referendum)	51
Artikel 36:	Pembubaran, Percantuman dan Lain-Lain	51 - 53

Artikel 37:	Pentafsiran	53
Artikel 38:	Peruntukan - Peruntukan Umum Mengenai Cawangan Ranting dan Pergerakan Pemuda, Pergerakan Wanita dan Pergerakan Belia PBB	53 - 54
Artikel 39:	Peruntukan - Peruntukan Khas	54
Artikel 40:	Tarikh Kuatkuasa Perlembagaan	55

PERLEMBAGAAN PARTI PESAKA BUMIPUTERA BERSATU SARAWAK (PBB)

ARTIKEL 1: NAMA

Perlembagaan ini dinamakan “PERLEMBAGAAN PARTI PESAKA BUMIPUTERA BERSATU SARAWAK” (selepas ini disebut “Perlembagaan”) dan dengannya tertubuhlah suatu Pertubuhan yang dinamakan “Parti Pesaka Bumiputera Bersatu Sarawak” (selepas ini disebut “Parti”) atau dikenali dengan nama singkatannya “PBB”.

ARTIKEL 2: ALAMAT BERDAFTAR

Alamat berdaftar Parti ialah IBU PEJABAT PBB, Jalan Bako, 93050 Kuching, Sarawak ataupun di mana-mana tempat yang ditetapkan dari semasa ke semasa oleh Majlis Tertinggi dengan mendapat kelulusan daripada Pendaftar Pertubuhan terlebih dahulu.

ARTIKEL 3: LAMBANG

- (1) Contoh lambang Parti adalah seperti di bawah ini:-



- (2) Lambang Parti merupakan segi empat membujur yang terbahagi kepada dua warna yang sama besar iaitu warna merah pada separuh bahagian atas dan warna putih pada separuh bahagian bawah. Satu utap berwarna kuning yang dipenuhi ukiran seni tradisional berwarna hitam terletak di antara kedua-dua bahagian tersebut. Sebilah keris berwarna putih terhunus, hujungnya menghala ke penjuru di sebelah kiri dan hulunya di penjuru di sebelah atas kanan manakala sebatang lembing berwarna putih terhunus, hujungnya menghala ke penjuru di sebelah atas kiri dan hulunya di penjuru di sebelah bawah kanan.

Kedua-dua senjata ini bersilang di tengah-tengah utap yang menjadi latar belakang kedua-duanya di mana lembing terletak di bawah keris. Huruf “PBB” terletak di sebelah bawah sekali yang berlatar belakangkan warna putih. Semua ini terletak di dalam satu lagi segi empat membujur yang berlatar belakangkan warna putih dilingkari oleh garisan hitam.

(3) Lambang ini mempunyai makna seperti berikut:-

- | | | |
|-----------------------------------|--------|---------------------------------|
| (a) Makna : | merah | - Berani |
| | putih | - Bersih |
| | hitam | - Kepahlawanan |
| | kuning | - Kesetiaan |
| (b) Keris dan Lembing | | - Sedia Berkorban |
| (c) Utap | | - Mempertahankan Hak Bumiputera |
| (d) Ukiran | | - Kekayaan Budaya |
| (e) Persilangan Keris dan Lembing | | - Keharmonian Kaum |

ARTIKEL 4: LENCANA

(1) Contoh Lencana Parti adalah seperti di bawah ini:-



- (2) Rupa bentuk Lencana Parti adalah serupa dengan rupa bentuk lambang Parti. Tiap-tiap ahli hendaklah mempunyai Lencana Parti dan hendaklah dikeluarkan oleh Ibu Pejabat Parti.
- (3) Majlis Tertinggi berkuasa membuat sebarang peraturan berkenaan dengan saiz dan pemakaiannya oleh ahli-ahli.

ARTIKEL 5: BENDERA

(1) Contoh Bendera adalah seperti di bawah ini:



- (2) Rupa bentuk Bendera adalah segi empat membujur yang menyerupai lambang Parti tanpa huruf “PBB” dan latar belakangnya tidak tertera.
- (3) Majlis Tertinggi berkuasa membuat sebarang peraturan berkenaan dengan saiz pemakaiannya dari semasa ke semasa.

ARTIKEL 6: COGAN KATA DAN SERUAN

- (1) Cogan Kata Parti ialah **“BERKORBAN BERSATU”**.
- (2) Seruan Parti ialah **“BERJASA MALAYSIA”**.

ARTIKEL 7: TUJUAN-TUJUAN DAN KUASA-KUASA

- (1) Tujuan-tujuan Parti adalah seperti berikut:-
 - (a) Memelihara dan mempertahankan kemerdekaan, kedaulatan dan keperibadian Malaysia;
 - (b) Mendukung Perlembagaan Malaysia dan Perlembagaan Negeri Sarawak;
 - (c) Memelihara serta mempertahankan prinsip-prinsip yang terkandung dalam Perlembagaan Malaysia dan Perlembagaan Negeri Sarawak, terutama sekali, mengenai kedudukan, hak asasi dan hak keistimewaan bumiputera Malaysia;
 - (d) Memelihara dan menjamin hak-hak masa depan bumiputera Sarawak;
 - (e) Menjalankan apa-apa jua ikhtiar bagi kebajikan dan kemajuan bumiputera khususnya dan Warganegara Malaysia yang taat setia amnya dalam lapangan pelajaran, ekonomi, sosial dan kebudayaan;
 - (f) Menggalak dan memelihara perasaan muhibbah dan perpaduan di kalangan Warganegara Malaysia supaya melahirkan satu bangsa yang kuat dan bersatu;
 - (g) Mengawal dan memelihara asas-asas pemerintahan demokrasi berparlimen;
 - (h) Menyokong dan mempertahankan Piagam Bangsa-Bangsa Bersatu; dan

- (i) Mengambil sebarang langkah yang berkesan untuk menghapuskan apa jua pergerakan subersif yang boleh mengancam keselamatan Malaysia.
- (2) Kuasa-Kuasa Parti di antara lain, adalah seperti berikut:-
 - (a) Memiliki harta alih dan tak alih serta kemudahan-kemudahan lain yang difikirkan perlu oleh Parti;
 - (b) Mengumpul wang untuk menambahkan tabung Parti supaya dapat digunakan untuk menjalankan aktiviti-aktivitinya seperti yang tersebut di atas; dan
 - (c) Wang Parti boleh dilaburkan untuk tujuan yang dibenarkan yang mana boleh mendatangkan keuntungan kepada Parti.

ARTIKEL 8: KELAYAKAN KEAHLIAN

- (1) Dengan tertakluk kepada **fasal** (2), Keahlian Parti adalah terbuka kepada mana-mana individu yang memenuhi syarat-syarat seperti berikut:-
 - (a) Warganegara Malaysia;
 - (b) Bumiputera Sarawak
 - (c) Berumur sekurang-kurangnya 18 tahun;
 - (d) Tidak menjadi ahli sebarang Parti Politik yang lain;
 - (e) Bersetuju mematuhi Perlembagaan, Peraturan-Peraturan dan dasar-dasar Parti; dan
 - (f) Bersetuju mematuhi syarat-syarat yang ditetapkan oleh Majlis Tertinggi.
- (2) Ahli-ahli Parti Bumiputera dan Pesaka termasuk mereka yang bukan bumiputera, pada tarikh Parti ini didaftarkan, akan terus menjadi ahli sehinggalah keahlian mereka itu tamat dengan syarat mereka adalah warganegara Malaysia.
- (3) Warganegara Malaysia dan salah seorang dari ibu atau bapanya adalah seorang bumiputera Sarawak adalah layak menjadi ahli

ARTIKEL 9: PERMOHONAN KEAHLIAN

- (1) Seseorang yang hendak menjadi ahli hendaklah menghantar permohonannya kepada Setiausaha Ranting di tempat di mana dia hendak menjadi ahli dengan menggunakan Borang Permohonan rasmi Parti dan Borang Permohonan itu hendaklah ditandatangani oleh pemohon.
- (2) Di dalam kawasan di mana Ranting belum lagi ditubuhkan, permohonan menjadi ahli hendaklah dihantar terus kepada Setiausaha Agung untuk dikemukakan kepada Majlis Tertinggi untuk pertimbangan.
- (3) Tiap-tiap permohonan menjadi ahli hendaklah dicadang dan disokong oleh dua orang yang telah diterima menjadi ahli.
- (4) Majlis Tertinggi berhak mengadakan Peraturan-Peraturan atau menentukan syarat-syarat tambahan menjadi ahli.

ARTIKEL 10: PENERIMAAN KEAHLIAN

- (1) Setiausaha Ranting hendaklah membawa semua permohonan menjadi ahli ke Mesyuarat Jawatankuasa Ranting dengan seberapa segera atau pun jika mesyuarat itu tidak dapat diadakan dengan mengedarkannya kepada ahli-ahli Jawatankuasa Ranting untuk pertimbangan.
- (2) Jawatankuasa Ranting hendaklah menimbangkan semua permohonan menjadi ahli dan, tertakluk kepada **fasal** (3), (5) & (6) memutuskan sama ada permohonan itu disetuju- terima atau ditolak, atau ditangguhkan pertimbangannya tanpa memberi apa-apa sebab, melainkan dikehendaki oleh Majlis Tertinggi.
- (3) (a) Setelah Jawatankuasa Ranting memberi keputusannya tentang permohonan menjadi ahli, permohonan itu hendaklah dihantar kepada Setiausaha Agung menerusi Cawangan.

(b) Setiausaha Agung hendaklah pula dengan serta merta membentangkan permohonan itu di hadapan Majlis Tertinggi untuk pengesahan.

- (c) Majlis Tertinggi berkuasa mengesahkan atau mengubah keputusan Jawatankuasa Ranting.
- (d) Majlis Tertinggi boleh memberikan kuasa kepada mana-mana ahli untuk menjalankan kuasanya di bawah **fasal** (3) (c).
- (4) Jika Majlis Tertinggi mengesahkan keputusan Jawatankuasa Ranting dengan menyetujui-terima permohonan menjadi ahli itu, si pemohon itu adalah dikira sebagai seorang ahli dari tarikh Jawatankuasa Ranting memberi keputusannya ataupun dari suatu tarikh yang ditentukan oleh Majlis Tertinggi.
- (5) Seseorang hanya dibenarkan menjadi ahli di dalam satu Ranting sahaja.
- (6) Seseorang yang dipecat atau menarik diri daripada menjadi ahli tidak boleh diterima kembali menjadi ahli, melainkan jika dia terlebih dahulu mendapat kebenaran bertulis daripada Majlis Tertinggi.
- (7) Seseorang bekas ahli parti lain tidak boleh diterima menjadi ahli terlebih dahulu, melainkan telah mendapat kebenaran bertulis daripada Majlis Tertinggi.
- (8) Seseorang yang telah ditolak permohonannya untuk menjadi ahli oleh Jawatankuasa Ranting boleh merayu kepada Jawatankuasa Cawangan dan jika permohonannya ditolak oleh Jawatankuasa Cawangan boleh merayu kepada Majlis Tertinggi dan keputusan Majlis Tertinggi dalam kedua-dua hal ini adalah muktamad.

ARTIKEL 11: TANGGUNGJAWAB DAN HAK AHLI

- (1) Tiap-tiap ahli hendaklah mempunyai tanggungjawab seperti berikut:-
 - (a) Memegang teguh dasar Parti dan melaksanakan tujuan-tujuannya;
 - (b) Menghadiri mesyuarat-mesyuarat Parti dan mengambil bahagian dalam kegiatan-kegiatan Parti;

- (c) Menjalankan kerja-kerja Parti dan mematuhi arahan serta disiplin Parti;
 - (d) Menyokong **calon-calon** Parti yang bertanding dalam pilihanraya;
 - (e) Berkhidmat kepada orang ramai; dan
 - (f) Bersedia dan sanggup menentang musuh-musuh Negara.
- (2) Tiap-tiap ahli mempunyai hak-hak seperti berikut:-
- (a) Bercakap, mengemukakan pendapat dan mengundi di dalam mesyuarat-mesyuarat Parti tetapi hak mengundi tidak boleh diwakilkan kepada mana-mana orang lain;
 - (b) Memilih dan dipilih untuk memegang sebarang jawatan dalam Parti; dan
 - (c) Menjadi **calon** dalam pilihanraya, jika dipilih.
- (3) Hak-hak yang tersebut di bawah **fasal** (2) akan terbatal apabila:-
- (a) Ahli yang dikenakan tindakan disiplin mengikut **Artikel** 25; dan
 - (b) Ahli yang melanggar peruntukan-peruntukan Akta Pertubuhan, 1966.
- (4) Seseorang ahli itu tidak berhak:-
- (a) menjadi Ahli lebih daripada satu Ranting;
 - (b) menjadi Ketua, Timbalan Ketua atau Ahli Jawatankuasa dalam lebih daripada satu Ranting atau Cawangan melainkan dengan kebenaran bertulis daripada Majlis Tertinggi;
 - (c) menjadi Ahli Jawatankuasa di peringkat yang sama di mana dia telah dipilih menjadi Ketua, Timbalan Ketua atau selainnya;

- (d) menjadi Ketua, Timbalan Ketua atau Ahli Jawatankuasa di peringkat yang sama di mana dia telah dipilih menjadi Juruaudit atau sebaliknya;
- (e) mengambil bahagian bercakap, mengundi dan dipilih di dalam Mesyuarat Agung Ranting dan Mesyuarat Perwakilan Cawangan selain daripada Ranting dan Cawangan di mana dia menjadi ahli; dan
- (f) mengambil bahagian bercakap, mengundi dan dipilih di dalam Mesyuarat Agung mana-mana Ranting dan Mesyuarat Perwakilan Cawangan baru yang dimasukinya sekiranya dia telah menggunakan hak-haknya dalam Ranting atau Cawangan asalnya bagi Mesyuarat Agung Ranting dan Mesyuarat Perwakilan Cawangan yang berkenaan.

ARTIKEL 12: PEMBERHENTIAN KEAHLIAN

- (1) Seseorang ahli boleh berhenti daripada menjadi ahli dengan menyatakan kehendaknya melalui surat kepada Setiausaha Ranting.
- (2) Setiausaha Ranting, setelah menerima surat berhenti daripada menjadi ahli itu, hendaklah memaklumkan hal sedemikian itu kepada Jawatankuasa Ranting dan Setiausaha Agung.
- (3) Keahlian seseorang ahli terhenti secara serta-merta apabila berlaku mana-mana satu yang berikut:-
 - (a) Ahli berkenaan meminta untuk berhenti menurut Artikel 12(1).
 - (b) Mengisytiharkan keluar daripada parti.
 - (c) Menyertai atau menjadi ahli mana-mana parti politik lain di negara ini.
 - (d) Bertanding dalam pilihan raya tanpa kebenaran parti atau sebagai calon bebas atau calon mana-mana parti atau bertindak sebagai Pencadang / Penyokong dalam kertas penamaan calon bebas atau calon parti lawan.

- (e) Dipecat setelah melalui proses dan tatacara disiplin parti menurut Artikel 25.
- (f) Seseorang ahli membawa apa-apa jua perkara parti atau hak keahliannya ke mahkamah.
- (g) Hilang kewarganegaraannya.

ARTIKEL 13: PERHIMPUNAN AGUNG

- (1) Urusan Parti adalah dijalankan di bawah kuasa dan perintah Perhimpunan Agung, tetapi Perhimpunan Agung itu sendiri adalah tertakluk di bawah Perlembagaan ini dan juga Peraturan-Peraturan Perhimpunan Agung.
- (2) Perhimpunan Agung Tiga Tahun Sekali hendaklah diadakan dengan secepat mungkin setelah tempohnya berakhir pada tarikh yang ditentukan oleh Majlis Tertinggi.
- (3) Agenda Perhimpunan Agung Tiga Tahun Sekali ialah seperti berikut:-
 - (a) Ucaptama Yang DiPertua Parti;
 - (b) membaca dan mengesahkan Minit Perhimpunan Agung **Tiga Tahun Sekali** yang lalu;
 - (c) membincangkan perkara-perkara yang berbangkit daripada Minit Perhimpunan Agung Tiga Tahun Sekali yang lalu;
 - (d) menerima **Laporan** Majlis Tertinggi berkenaan kerja-kerja Parti di dalam tempoh tiga (3) tahun yang lalu;
 - (e) menerima **Laporan** Bendahari dan penyata kira-kira yang telah diaudit bagi tempoh tiga (3) tahun yang lalu;
 - (f) menentukan dasar-dasar Parti;
 - (g) mengkaji peranan dan tanggungjawab Majlis Tertinggi;
 - (h) memilih Yang DiPertua, dua (2) orang Timbalan Yang DiPertua, dua (2) orang Naib Yang DiPertua Kanan,

tujuh (7) orang Naib Yang DiPertua dan **tiga puluh (30)** orang ahli Majlis Tertinggi bagi tempoh tiga (3) tahun yang akan datang;

- (i) melantik dua (2) orang Juruaudit bagi tempoh tiga (3) tahun yang akan datang;
 - (j) melantik tiga (3) orang pegawai bagi maksud Seksyen 9 (b) Akta Pertubuhan 1966 yang hendaklah terdiri daripada pemegang-pemegang jawatan Parti;
 - (k) melantik satu (1) orang pegawai awam bagi maksud Seksyen 9 (c) Akta Pertubuhan 1966; dan
 - (l) menguruskan perkara-perkara lain yang dibentangkan di dalam Perhimpunan Agung.
- (4) (a) Perhimpunan Agung Khas bolehlah diadakan pada bila-bila masa mengikut salah satu daripada syarat-syarat seperti berikut:
- (i) Atas kehendak Majlis Tertinggi, atau
 - (ii) Atas kehendak Yang DiPertua, atau
 - (iii) Atas permintaan bertulis daripada sekurang-kurangnya satu pertiga daripada bilangan perwakilan Perhimpunan Agung dan permintaan itu hendaklah disokong dengan alasan-alasan yang munasabah.
- (b) Perhimpunan Agung Khas yang dimintakan menurut **fasal (4)** (a)(iii) hendaklah diadakan dalam tempoh empat puluh lima (45) hari dari tarikh permintaan tersebut diterima dan sekurang-kurangnya empat belas (14) hari notis hendaklah diberikan kepada semua Setiausaha Cawangan dan ahli-ahli yang layak menghadirinya.
- (5) Perhimpunan Agung hendaklah terdiri daripada:-
- (a) Pengerusi Tetap;
 - (b) ahli-ahli Majlis Tertinggi;
 - (c) Tertakluk kepada **Artikel 15 (8)**, tiap-tiap Cawangan

adalah layak menghantarkan tidak lebih daripada sepuluh (10) orang perwakilan ke Perhimpunan Agung (Termasuk Ketua Pergerakan Pemuda Cawangan dan Ketua Pergerakan Wanita Cawangan);

- (d) Ketua Cawangan, dan jika Ketua Cawangan sendiri tidak dapat hadir; seorang Ahli Jawatankuasa Cawangan yang dilantik oleh Ketua Cawangan dengan surat untuk mewakili Cawangan itu;
 - (e) Tidak lebih daripada lima (5) orang perwakilan Pergerakan Pemuda yang dipilih oleh Perhimpunan Agungnya;
 - (f) Tidak lebih daripada lima (5) orang perwakilan Pergerakan Wanita yang dipilih oleh Perhimpunan Agungnya;
 - (fa) Tidak lebih daripada lima (5) orang perwakilan Pergerakan Belia PBB yang dipilih oleh Perhimpunan Agungnya;
 - (g) Jawatankuasa Pentadbir yang dilantik oleh Majlis Tertinggi untuk mentadbirkan sesebuah Cawangan yang sedang dalam penggantian, berkuasa memilih mana-mana ahli-ahli dari Cawangan itu untuk menghadiri Perhimpunan Agung sekiranya Cawangan itu belum lagi memilih perwakilan.
- (6) (a) Ahli-ahli yang menjadi Ahli-ahli Dewan Negara, Dewan Rakyat atau Dewan Undangan Negeri selain daripada mereka yang tergolong di bawah **fasal** (5) diatas boleh menghadiri sebarang Perhimpunan Agung dan mereka mempunyai hak mengundi.
- (b) Ahli-ahli Jawatankuasa Cawangan boleh menghadiri mana-mana Perhimpunan Agung tetapi mereka tidak mempunyai hak mengundi melainkan jika mereka tergolong di bawah **fasal** (5) di atas.
- (7) Jika seseorang perwakilan itu telah dipilih menjadi ahli Majlis Tertinggi maka Cawangan yang diwakilinya boleh meminta Majlis Tertinggi supaya tempat wakil itu digantikan dengan seorang wakil yang lain.

- (8) Perhimpunan Agung berkuasa memberhentikan seseorang pemegang jawatan Parti.
- (9) Bagi mengenangkan jasa cemerlang mana-mana ahli Parti, maka Perhimpunan Agung berhak melantik mana-mana ahli berkenaan sebagai Penaung Parti, siapa yang mempunyai hak menghadiri tiap-tiap Mesyuarat Majlis Tertinggi dan mana-mana Perhimpunan Agung Parti.
- (10) (a) Notis Perhimpunan Agung Tiga Tahun Sekali yang menerangkan tarikh, waktu, tempat dan memajukan usul-usul yang hendak dibincangkan dan kertas-kertas pencalonan untuk jawatan ahli-ahli Majlis Tertinggi hendaklah dihantar oleh Setiausaha Agung kepada tiap-tiap Setiausaha Cawangan dan ahli-ahli yang layak menghadiri Perhimpunan Agung itu tidak lewat daripada empat puluh lima (45) hari sebelum tarikh yang ditetapkan untuk Perhimpunan Agung itu, dan Notis tentang Perhimpunan Agung itu hendaklah dipamerkan dengan jelas kelihatan di Ibu Pejabat/Alamat berdaftar Parti. Tiap-tiap Cawangan hendaklah mengadakan Mesyuarat Perwakilan Cawangan Tiga Tahun Sekali tidak lewat daripada tiga puluh (30) hari sebelum tarikh yang ditetapkan untuk Perhimpunan Agung atau pun dalam masa yang ditetapkan oleh Majlis Tertinggi.
 - (b) Notis yang dipamerkan adalah Notis kepada keseluruhan Perwakilan dan ahli-ahli Parti.
- (11) Pencalonan-pencalonan untuk jawatan ahli-ahli Majlis Tertinggi dan usul-usul untuk dibentangkan di dalam Perhimpunan Agung itu hendaklah dihantarkan oleh tiap-tiap Setiausaha Cawangan kepada Setiausaha Agung tidak lewat daripada tiga puluh lima (35) hari sebelum tarikh yang ditetapkan untuk Perhimpunan Agung **atau pun dalam masa yang ditetapkan oleh Majlis Tertinggi.**
- (12) (a) Setiausaha Agung hendaklah menghantar agenda Perhimpunan Agung kepada tiap-tiap Setiausaha Cawangan dan Ahli-ahli yang layak menghadiri Perhimpunan Agung itu sekurang-kurangnya tujuh (7) hari sebelum Perhimpunan Agung itu diadakan. Salinan Minit Perhimpunan Agung Tiga Tahun Sekali yang lalu,

Laporan-laporan, Usul-Usul, Pencalonan-pencalonan untuk jawatan ahli-ahli Majlis Tertinggi dan Penyata Kira-Kira bagi tiga tahun yang lalu yang telah diaudit, dan jika tidak sempat disertakan bersama Notis Perhimpunan Agung hendaklah diberikan dalam masa yang ditetapkan oleh Majlis Tertinggi sebelum Perhimpunan Agung itu diadakan.

- (b) Salinan surat-surat ini hendaklah diberikan kepada tiap-tiap Ketua Cawangan dan **dipamerkan** pada papan kenyataan di Ibu Pejabat/Alamat Berdaftar Parti.
- (c) Agenda yang dipamerkan di Ibu Pejabat Parti adalah memenuhi **fasal** 12 (a) di atas.
- (13) Kuorum untuk sebarang Perhimpunan Agung hendaklah dianggap cukup jika perwakilan Cawangan yang hadir, tidak kira berapa jumlahnya, mewakili tidak kurang daripada setengah bilangan Cawangan dan tidak kurang daripada setengah jumlah ahli yang layak menghadirinya menurut **fasal** (5) (a), (c), (d) dan (e).
- (14) Jika kuorum tidak cukup selepas setengah jam daripada waktu yang ditetapkan bagi Perhimpunan Agung itu, maka ia hendaklah ditangguhkan kepada suatu tarikh tidak lebih daripada tujuh (7) hari dan jika kuorum tidak cukup selepas setengah jam dari waktu yang ditetapkan bagi Perhimpunan Agung yang ditangguhkan itu, maka berkuasalah perwakilan/ahli-ahli yang layak hadir menjalankan Perhimpunan Agung bagi hari itu tetapi tidaklah berkuasa meminda Perlembagaan ini dan membuat apa-apa keputusan yang melibatkan kepentingan semua ahli.
- (15) **Fasal** (13) dan (14) Perlembagaan ini berkenaan kuorum dan penangguhan Perhimpunan Agung Tiga Tahun Sekali hendaklah juga terpakai bagi Perhimpunan Agung Khas tetapi dengan syarat bahawa jika kuorum tidak mencukupi selepas dua (2) jam dari waktu yang telah ditetapkan bagi Perhimpunan Agung Khas itu, atas permintaan perwakilan-perwakilan maka Perhimpunan Agung Khas itu hendaklah dibatalkan dan tidak boleh diadakan Perhimpunan Agung Khas semula bagi tujuan yang sama dalam tempoh masa 6 bulan daripada tarikh Perhimpunan Agung Khas yang telah dibatalkan itu.

ARTIKEL 14: MAJLIS TERTINGGI

- (1) Majlis Tertinggi hendaklah terdiri daripada pemegang-pemegang jawatan seperti berikut:-
 - (a) Yang DiPertua;
 - (b) Dua (2) orang Timbalan Yang DiPertua;
 - (c) Dua (2) orang Naib Yang DiPertua Kanan dan Sepuluh (10) orang Naib Yang DiPertua (termasuk seorang Ketua Pergerakan Pemuda, seorang Ketua Pergerakan Wanita dan seorang Ketua Pergerakan Belia PBB);
 - (d) Pengerusi Tetap;
 - (e) Setiausaha Agung;
 - (f) Timbalan Setiausaha Agung;
 - (g) Tidak lebih daripada lima (5) orang Penolong Setiausaha Agung;
 - (h) Bendahari;
 - (i) Penolong Bendahari;
 - (j) Ketua Penerangan;
 - (k) Penolong Ketua Penerangan;
 - (l) Tidak lebih daripada tiga puluh dua (32) orang ahli termasuk lima (5) ahli dari Pergerakan Pemuda, lima (5) ahli dari Pergerakan Wanita dan dua (2) ahli dari Pergerakan Belia PBB yang dilantik oleh Yang DiPertua dengan persetujuan Majlis Tertinggi; dan
 - (m) **Tiga puluh (30) orang ahli Majlis Tertinggi yang dipilih.**
- (2) **Yang DiPertua, dua (2) orang Timbalan Yang DiPertua, dua (2) orang Naib Yang DiPertua Kanan dan tujuh (7) orang daripada Naib Yang DiPertua dan tiga puluh (30)**

orang ahli Majlis Tertinggi hendaklah dipilih oleh Perhimpunan Agung Tiga Tahun Sekali.

- (3) Ketua Pergerakan Pemuda, Ketua Pergerakan Wanita dan Ketua Pergerakan Belia adalah secara automatik menjadi Naib-Naib Yang DiPertua.
- (4) Setiausaha Agung, Bendahari dan Ketua Penerangan serta Timbalan dan Penolong-Penolong mereka, hendaklah dilantik oleh Yang DiPertua dengan persetujuan Majlis Tertinggi dan hendaklah memegang jawatan mereka sehingga mereka berhenti atau diberhentikan oleh Yang DiPertua dengan persetujuan Majlis Tertinggi atas sebab-sebab tertentu atau sehingga tempoh bagi mereka memegang jawatan masing-masing berakhir.
- (5) Yang DiPertua, dengan persetujuan Majlis Tertinggi, berkuasa melantik mana-mana ahli untuk mengisi kekosongan jawatan disebabkan oleh pemberhentian seseorang pemegang jawatan Parti.
- (6) Jika Yang DiPertua berhenti daripada jawatannya, maka salah seorang daripada Timbalan-Timbalan Yang DiPertua hendaklah memangku jawatan itu sehingga Yang DiPertua baru dipilih oleh Perhimpunan Agung.
- (7) Sebarang jawatan yang dipertandingkan hendaklah dicadang oleh Cawangan dan pemilihan dijalankan dengan cara mengundi di dalam Perhimpunan Agung Tiga Tahun Sekali.
- (8) Tempoh bagi semua pemegang jawatan Majlis Tertinggi ialah tiga tahun sahaja atau sehingga pengganti mereka dipilih/dilantik.
- (9) Mesyuarat Majlis Tertinggi hendaklah diadakan:-
 - (a) Sekurang-kurangnya sekali dalam tiap-tiap tiga (3) bulan;
 - (b) Atas kehendak Yang DiPertua; dan
 - (c) Atas permintaan bertulis daripada sekurang-kurangnya satu pertiga daripada ahli-ahli Majlis Tertinggi.

- (10) Separuh daripada ahli-ahli Majlis Tertinggi adalah cukup bagi menjalankan mesyuaratnya dan sekurang-kurangnya tujuh (7) hari notis hendaklah diberi kepada setiap ahli-ahlinya kecuali dalam keadaan yang dianggap mustahak Mesyuarat Majlis Tertinggi boleh diadakan dengan notis yang singkat.
- (11) (a) Majlis Tertinggi adalah badan yang bertanggungjawab terhadap pentadbiran Parti di bawah kuasa dan perintah Perhimpunan Agung.
(b) Majlis Tertinggi adalah berkuasa menjalankan sebarang langkah bagi pihak Perhimpunan Agung, dengan syarat tidak terkeluar daripada peruntukan-peruntukan Perlembagaan Parti.
- (12) (a) Jika dua pertiga atau pun lebih daripada ahli-ahli Majlis Tertinggi berhenti dengan serentak, maka hendaklah diadakan Perhimpunan Agung khas untuk menubuhkan Majlis Tertinggi dalam masa enam (6) bulan daripada tarikh perletakan jawatan beramai-ramai itu bagi memilih ahli-ahli Majlis Tertinggi baru bagi menggantikan mereka yang berhenti dan Perhimpunan Agung Khas itu hendaklah menetapkan tempoh perkhidmatan Majlis Tertinggi yang baru ditubuhkan itu.
(b) Sementara itu, ahli-ahli Majlis Tertinggi yang berhenti hendaklah terus mentadbir hal ehwal Parti sehingga tertubuhnya Majlis Tertinggi yang baru.
- (13) Tanggungjawab-tanggungjawab, dan kuasa-kuasa Majlis Tertinggi adalah seperti berikut:-
 - (a) Mengubal dasar-dasar dan rancangan-rancangan siasah, ekonomi, pelajaran, kebudayaan dan isu masyarakat Malaysia amnya dan Sarawak khasnya atau sebuah pihak berkuasa tempatan dan membentangkan kesemuanya itu dalam Perhimpunan Agung;
 - (b) Memilih calon-calon bagi perlantikan sebagai Ahli Dewan Negara atau Pihak Berkuasa Tempatan (Local Authorities) dan calon-calon pilihanraya Dewan Rakyat atau Dewan Undangan Negeri;

- (c) Mengawal, mengelola dan memutuskan apa-apa perkara mengenai pilihanraya Negeri dan Parlimen atau Pihak Berkuasa Tempatan;
- (d) Mencari ikhtiar dan mengambil langkah bersama-sama dengan kumpulan atau pun pertubuhan di dalam negeri atas perkara-perkara yang berkenaan dengan hal-hal siasah atau lain-lain yang sesuai dengan Perlembagaan ini;
- (e) Memilih ahli-ahli bagi mewakili Parti di dalam mana-mana kumpulan, perhimpunan, majlis mesyuarat dan sebagainya;
- (f) Mengesah dan mengiktiraf penubuhan Cawangan-Cawangan menurut Perlembagaan Parti;
- (g) Memantau pentadbiran dan pengurusan tiap-tiap Cawangan Parti;
- (h) Menyelesaikan sebarang perselisihan yang berbangkit di kalangan ahli Parti;
- (i) Memberhentikan seseorang ahli Majlis Tertinggi sekiranya didapati dia tidak menyempurnakan tugasnya dengan sempurna atau bertindak bertentangan dengan dasar-dasar Parti dan berkuasa melantik penggantinya;
- (j) Membentang kepada Perhimpunan Agung Tiga Tahun Sekali suatu penyata yang membutirkan pekerjaan dan kemajuan Parti dalam masa tiga (3) tahun yang lalu serta membentangkan pernyataan dan penyata kira-kira yang telah diperiksa dan disahkan oleh Juruaudit;
- (k) Menjalan kehendak Perlembagaan Parti dan Peraturan-Peraturan Perhimpunan Agung;
- (l) Menegak tata-tertib Parti ini dan mengambil apa-apa langkah yang perlu termasuk menggantung hak-hak seseorang ahli, memberhentikan seseorang ahli atau menggantung atau membubarkan mana-mana Jawatankuasa Cawangan atau Jawatankuasa Ranting dan juga membubarkan Cawangan atau Ranting;

- (m) Menjalankan apa jua langkah selain daripada yang tersebut di atas bagi kesempurnaan perjalanan Parti asalkan tidak bertentangan dengan mana-mana undang-undang yang sedang berkuatkuasa; dan
 - (n) Majlis Tertinggi berkuasa melantik mana-mana Jawatankuasa atau Biro bagi menjalankan urusan-urusan Parti yang mana difikirkan relevan dan berkuasa menarik balik daripada mana-mana Jawatankuasa atau Biro semua atau mana-mana kuasa-kuasa yang diberi dan membatalkan semua perlantikan tertentu. Mana-mana Jawatankuasa atau Biro yang dilantik hendaklah, dalam menggunakan kuasa-kuasa yang diberi patuh kepada mana-mana Peraturan-Peraturan yang dikeluarkan dari semasa ke semasa oleh Majlis Tertinggi.
- (14) Sekiranya berlaku kekosongan jawatan dalam Majlis Tertinggi maka Majlis Tertinggi berkuasa melantik seorang ahli untuk mengisi kekosongan tersebut sehingga tamatnya penggal Majlis Tertinggi.

ARTIKEL 15: CAUCUS PARLIMEN (PARLIAMENTARY CAUCUS)

- (1) Hendaklah ditubuhkan suatu “Caucus Parlimen” yang terdiri daripada penjawat-penjawat jawatan seperti berikut:-
 - (a) Ahli-Ahli Dewan Undangan Negeri Sarawak;
 - (b) Ahli Dewan Rakyat Malaysia; dan
 - (c) Ahli Dewan Negara Malaysia.
- (2) Ahli-ahli Caucus Parlimen hendaklah secara automatik mengambil bahagian dalam mesyuarat Majlis Tertinggi tanpa hak mengundi.
- (3) Ahli-ahli Caucus Parlimen yang dipilih sebagai ahli Dewan Undangan Negeri hendaklah menjadi **Ketua** Cawangan di dalam kawasan pilihanraya negeri masing-masing dan berhak mengundi.
- (4) Mana-mana ahli Caucus Parlimen yang dipilih sebagai Ahli

Cawangan dalam Cawangan yang tidak diwakili oleh Ahli Dewan Undangan Negeri PBB.

- (5) Majlis Tertinggi boleh melantik ahli Dewan Negara menjadi ahli Jawatankuasa Cawangan dalam Cawangan yang tidak diwakili oleh Ahli Dewan Undangan Negeri PBB atau Ahli Parlimen PBB.
- (6) Caucus Parlimen hendaklah, apabila keadaan memerlukan, berunding dengan komponen-komponen Gabungan Parti Sarawak (GPS), membuat perakuan kepada Tuan Yang Terutama Yang di-Pertua Negeri Sarawak mengenai pelantikan Premier Sarawak dari kalangan ahli Caucus Parlimen
- (7) Sekiranya perakuan dalam fasal (6) di atas diperkenankan oleh Tuan Yang Terutama Yang di-Pertua Negeri Sarawak, maka Premier Sarawak yang baru dan pertama kali dilantik hendaklah secara automatik menjadi Yang DiPertua Parti bagi tempoh tiga (3) tahun. Penyandang jawatan Yang DiPertua Parti hendaklah memberi laluan kepada penjawat jawatan baru tersebut
- (8) Tidak tertakluk kepada **Artikel** 13 (5) (b) mana-mana Cawangan yang diwakili oleh Caucus Parlimen yang terdiri daripada Ahli Dewan Undangan Negeri hendaklah diberi tambahan lima (5) perwakilan di samping sepuluh (10) perwakilan yang sedia ada di dalam Perhimpunan Agung.
- (9) Yang DiPertua Parti hendaklah menjadi Pengerusi Caucus Parlimen dan menetapkan peraturan-peraturan bagi perjalanan Caucus Parlimen.
- (10) Sekiranya Yang DiPertua Parti tidak dapat menghadirkan diri dalam Mesyuarat Caucus Parlimen, Pengerusi Mesyuarat hendaklah dipilih dari kalangan ahli Caucus Parlimen berkenaan.
- (11) Semua keputusan yang dibuat oleh Caucus Parlimen adalah dengan undi mudah dan sekiranya bilangan undi sama banyak Pengerusi Mesyuarat hendaklah mempunyai undi Pemutus.

- (12) Pengerusi Tetap Perhimpunan Agung yang dilantik oleh Majlis Tertinggi hendaklah seorang ahli Caucus Parlimen yang sedang menjawat jawatan Speaker Dewan Undangan Negeri Sarawak atau Bekas Speaker Dewan Undangan Negeri Sarawak atau mana-mana ahli yang dipilih daripada kalangan Caucus Parlimen mengikut susunan tersebut. Pengerusi Tetap hendaklah menjadi ahli Majlis Tertinggi dengan mempunyai hak mengundi.
- (13) Caucus Parlimen hendaklah melantik seorang “ Chief Whip” dan seorang “Penolong Chief Whip” dari kalangan ahli-ahli Caucus Parlimen yang terdiri daripada kalangan Ahli-Ahli Dewan Undangan Negeri Sarawak bagi memastikan kepatuhan urusan di dalam Dewan Undangan Negeri Sarawak.

ARTIKEL 16: TANGGUNGJAWAB PEMEGANG-PEMEGANG JAWATAN

- (1) Yang DiPertua
 - (a) Menjadi Ketua Parti yang bertanggungjawab atas kesempurnaan **perjalanan** Parti dan **selanjutnya**;
 - (b) Melantik Pengerusi Tetap, Setiausaha Agung, Timbalan Setiausaha Agung, Penolong Setiausaha Agung, Bendahari , Penolong Bendahari , Ketua Penerangan dan Penolong Ketua Penerangan dan melantik tiga puluh dua (32) orang ahli Majlis Tertinggi mengikut Artikel 14(1)(l), (4) dan (5) dengan persetujuan Majlis Tertinggi.
 - (c) Bertanggungjawab ke atas semua pegawai dan ahli-ahli serta kesempurnaan pekerjaan Pejabat Setiausaha Agung;
 - (d) Memanggil dan mempengerusi Mesyuarat Majlis Tertinggi dan bertanggungjawab mengurus tiap-tiap mesyuarat itu dengan teratur; dan
 - (e) Mempunyai undi pemutus.
- (2) Timbalan-Timbalan Yang DiPertua:-
 - (a) Membantu Yang DiPertua dalam menjalankan tugas-tugasnya;

- (b) Salah seorang daripada mereka hendaklah mempengerusi Mesyuarat Majlis Tertinggi; dan
 - (c) Memangku jawatan Yang DiPertua semasa ketiadaannya.
- (3) Naib-Naib Yang DiPertua Kanan dan Naib-Naib Yang DiPertua Parti:-
 - (a) Membantu Yang DiPertua dalam menjalankan tugas-tugasnya;
 - (b) Salah seorang daripada Naib-Naib Yang DiPertua Kanan hendaklah mempengerusikan Mesyuarat Majlis Tertinggi semasa ketiadaan Yang DiPertua dan Timbalan-Timbalan Yang DiPertua; dan
 - (c) Salah seorang daripada Naib-Naib Yang DiPertua Kanan hendaklah memangku jawatan Yang DiPertua semasa ketiadaan Yang DiPertua dan Timbalan-Timbalan Yang DiPertua.
- (4) Setiausaha Agung
 - (a) Setiausaha Agung serta Timbalan Setiausaha Agung dan Penolong-Penolong Setiausaha Agung hendaklah bertanggungjawab mentadbir Parti menurut Perlembagaan ini dan Peraturan-Peraturan Parti, dan juga mereka hendaklah menjalankan arahan-arahan Perhimpunan Agung, Majlis Tertinggi atau Yang DiPertua;
 - (b) Mereka hendaklah bertanggungjawab menguruskan persuratan dan perhubungan serta menyimpan segala buku, dokumen dan surat-surat lain kecuali buku kira-kira;
 - (c) Bertanggungjawab melaporkan kepada Yang DiPertua segala tindakan yang dijalankan berhubung dengan Pentadbiran Parti;
 - (d) Bertanggungjawab atas penyediaan dan persiapan mengenai urusan mesyuarat Majlis Tertinggi dan Perhimpunan Agung; dan

- (e) Menyediakan penyata tahunan yang menerangkan pekerjaan dan kemajuan Parti kepada Majlis Tertinggi.
- (5) Bendahari
 - (a) Bendahari dan Penolong Bendahari hendaklah bertanggungjawab dalam hal kewangan Parti dan hendaklah menyimpan buku kira-kira dan mencatatkan dengan betul di dalamnya segala pendapatan dan perbelanjaan Parti;
 - (b) Semua cek-cek Parti hendaklah ditandatangani oleh Bendahari bersama-sama dengan pemegang jawatan lain yang ditentukan oleh Majlis Tertinggi;
 - (c) Bertanggungjawab atas kesempurnaan perjalanan kewangan Parti;
 - (d) Menyediakan anggaran pendapatan dan perbelanjaan tahunan dan menyerahkannya kepada Majlis Tertinggi;
 - (e) Bertanggungjawab menyediakan penyata kira-kira untuk diperiksa oleh Juruaudit yang dilantik oleh Perhimpunan Agung; dan
 - (f) Membentangkan penyata kira-kira dan butir-butir yang telah diperiksa dan disahkan oleh Juruaudit kepada Majlis Tertinggi dan Perhimpunan Agung.
- (6) Ketua Penerangan
 - (a) Ketua Penerangan dan Penolong Ketua Penerangan hendaklah bertanggungjawab menguruskan hal-ehwal penerangan tentang dasar-dasar dan tujuan-tujuan Parti kepada orang ramai dengan syarat bahawa apa-apa penerangan yang hendak dibuat hendaklah mendapat persetujuan Yang DiPertua atau Majlis Tertinggi terlebih dahulu; dan
 - (b) Melaporkan kepada Majlis Tertinggi tentang kegiatan-kegiatan Penerangan.
- (7) Ahli-Ahli Majlis Tertinggi Biasa

- (a) Hendaklah membantu di dalam menjalankan urusan Parti seperti mana yang diarahkan oleh Majlis Tertinggi dari semasa ke semasa; dan
- (b) Hendaklah membantu di dalam urusan menjaga nama baik Parti.

ARTIKEL 17: PENUBUHAN, PENTADBIRAN DAN PENGURUSAN CAWANGAN**(1) Penubuhan Cawangan-Cawangan**

- (a) Cawangan-Cawangan ditubuhkan dalam tiap-tiap kawasan yang ditentukan oleh Majlis Tertinggi dengan syarat hanya satu Cawangan sahaja boleh ditubuhkan di dalam tiap-tiap satu kawasan Pilihanraya Dewan Undangan Negeri;
- (b) Tiap-tiap Cawangan, hendaklah mempunyai beberapa Ranting dan ahli-ahli seperti yang ditentukan oleh Majlis Tertinggi. Penubuhan sesebuah Cawangan itu adalah atas persetujuan Majlis Tertinggi; dan
- (c) Peranan dan tanggungjawab tiap-tiap Cawangan hendaklah dijalankan di bawah kuasa dan arahan Mesyuarat Perwakilan Cawangan, tetapi Mesyuarat Perwakilan itu sendiri hendaklah tertakluk oleh Perlembagaan ini dan mana-mana Peraturan Parti.

(2) Mesyuarat Perwakilan Cawangan Tiga Tahun Sekali

- (a) Mesyuarat Perwakilan Cawangan Tiga Tahun Sekali hendaklah diadakan pada masa, tarikh dan tempat yang ditetapkan oleh Jawatankuasa Cawangan melainkan jika Majlis Tertinggi menetapkan satu tarikh yang berlainan tetapi tarikh itu tidaklah boleh lewat daripada tarikh diadakan Perhimpunan Agung Tiga Tahun Sekali.
- (b) Agenda Mesyuarat Perwakilan Cawangan Tiga Tahun Sekali ialah seperti berikut:-

- (i) Perutusan Ketua Cawangan;
 - (ii) Mengesah minit Mesyuarat Perwakilan Tiga Tahun Sekali yang lalu dan membincangkan perkara-perkara yang berbangkit daripada minit tersebut;
 - (iii) Menerima **laporan** berkenaan kerja-kerja yang telah dibuat oleh Jawatankuasa Cawangan di dalam **tempoh** tiga (3) tahun yang lalu;
 - (iv) Menerima **laporan** Bendahari Cawangan dan penyata kira-kira yang telah diaudit bagi **tempoh** tiga (3) tahun yang lalu;
 - (v) Memilih perwakilan Cawangan ke Perhimpunan Agung Tiga Tahun Sekali dan Perhimpunan Agung Khas. Jika ada antara perwakilan yang telah dipilih itu tidak dapat menghadiri mana-mana satu Perhimpunan Agung itu, maka Jawatankuasa Cawangan bolehlah melantik penggantinya daripada kalangan ahli-ahli Cawangan;
 - (vi) Memilih ahli-ahli Jawatankuasa Cawangan dan Juruaudit-Juruaudit untuk **tempoh** tiga tahun yang akan datang;
 - (vii) Mencadang calon-calon untuk bertanding menjadi ahli-ahli Majlis Tertinggi; dan
 - (viii) Mengurus perkara-perkara lain yang dibentangkan di dalam Mesyuarat Perwakilan itu.
- (3) Mesyuarat Perwakilan Cawangan Khas.
- (a) Mesyuarat Perwakilan Cawangan Khas bolehlah diadakan pada bila-bila masa mengikut salah satu daripada syarat-syarat seperti berikut:-
 - (i) Jika dikehendaki oleh Ketua Cawangan;
 - (ii) Atas permintaan bertulis daripada sekurang-kurangnya satu pertiga daripada bilangan ahli Jawatankuasa Cawangan atau Mesyuarat Perwakilan

Cawangan dan permintaan itu hendaklah disokong dengan alasan- alasan yang lengkap; dan

- (iii) Atas kehendak Majlis Tertinggi.
- (b) Mesyuarat Perwakilan Cawangan Khas adalah berkuasa memberhentikan seseorang ahli Jawatankuasa Cawangan dengan persetujuan sekurang-kurangnya dua pertiga daripada bilangan wakil-wakil yang hadir dan memilih penggantinya.
- (c) Mesyuarat Perwakilan Cawangan Khas yang diminta menurut **fasal** (3) (a) (ii) dan (iii) hendaklah diadakan di dalam **tempoh** tiga puluh lima (35) hari dan empat belas (14) hari notis hendaklah diberikan kepada semua Setiausaha Ranting dan ahli-ahli yang layak menghadirinya.
- (4) Sebarang Mesyuarat Perwakilan Cawangan hendaklah terdiri daripada -
 - (a) Ahli-ahli Jawatankuasa Cawangan.
 - (b) Tiga (3) orang wakil yang dilantik oleh Ranting-Ranting dalam Mesyuarat Agungnya.
 - (c) Ketua bagi setiap Ranting dalam sesebuah Cawangan itu dan jika seseorang Ketua itu tidak dapat hadir, seorang ahli Jawatankuasa Ranting hendaklah dilantik oleh Ketua tersebut untuk mewakili Ranting itu.
 - (d) Tiga (3) orang wakil Pergerakan Wanita yang dipilih dalam Mesyuarat Perwakilan Cawangannya.
 - (e) Tiga (3) orang wakil Pergerakan Pemuda yang dipilih dalam Mesyuarat Perwakilan Cawangannya.
- (5) Jika sekiranya seorang wakil itu telah dipilih menjadi ahli Jawatankuasa Cawangan, maka pihak yang diwakilinya itu bolehlah meminta kepada Jawatankuasa Cawangan supaya tempat wakil itu digantikan dengan seorang wakil lain.

- (6) Seseorang ahli yang menjadi Ahli Dewan Negara, Ahli Dewan Rakyat, Ahli Dewan Undangan Negeri ataupun ahli

Majlis Kerja Tempatan (Local Authority) dalam Cawangan itu boleh menghadiri mana-mana Mesyuarat Perwakilan Cawangan tetapi dia tidak berhak mengundi, melainkan jika dia tergolong dibawah **fasal** (4) di atas.

- (7) Mesyuarat Perwakilan Cawangan berkuasa memberhentikan mana-mana ahli Jawatankuasa Cawangan daripada jawatannya dengan persetujuan sekurang-kurangnya dua pertiga daripada bilangan ahli yang hadir dalam Mesyuarat Perwakilan atas sebab-sebab tertentu.
- (8) Kuorum untuk mana-mana Mesyuarat Perwakilan Cawangan hendaklah dianggap cukup jika wakil-wakil Ranting yang hadir, tidak kira jumlahnya, mewakili tidak kurang daripada setengah bilangan Ranting dan tidak kurang daripada setengah jumlah ahli-ahli yang layak mengahdirinya menurut **fasal** (4) (a), (b), (c), (d) dan (e).
- (9) Notis mesyuarat dan agenda hendaklah diberi kepada semua ahli dan wakil Ranting-Ranting yang layak menghadiri Mesyuarat Perwakilan Cawangan dan Setiausaha-Setiausaha Ranting tidak kurang daripada tiga puluh (30) hari sebelum sebarang Mesyuarat Perwakilan Cawangan diadakan.

ARTIKEL 17A: PENDAFTARAN CAWANGAN DAN RANTING

Cawangan-Cawangan hendaklah didaftar dengan Pejabat Pendaftar Pertubuhan mengikut Seksyen 12 Akta Pertubuhan 1966 manakala Ranting hendaklah didaftar dengan Ibu Pejabat PBB sahaja. Cawangan-Cawangan dan Ranting di peringkat Pergerakan Wanita dan Pergerakan Pemuda hendaklah didaftar dengan Ibu Pejabat PBB sahaja.

ARTIKEL 18: JAWATANKUASA CAWANGAN

- (1) Jawatankuasa Cawangan adalah merupakan badan yang bertanggungjawab untuk menjalankan pentadbiran Cawangan dan Jawatankuasa tersebut hendaklah menjalankan pekerjaannya menurut perintah Mesyuarat Perwakilan Cawangan dan Majlis Tertinggi.

- (2) Jawatankuasa Cawangan hendaklah bermesyuarat sekurang-kurangnya tiga (3) bulan sekali atau pada bila-bila masa lain jika diarahkan sedemikian oleh Ketua Cawangan atau atas permintaan bertulis daripada satu pertiga daripada bilangan ahlinya atau atas arahan Majlis Tertinggi.
- (3) Separuh daripada ahli-ahli Jawatankuasa Cawangan adalah cukup bagi menjalankan mesyuaratnya dan sekurang-kurangnya tujuh (7) hari notis bertulis hendaklah diberi kepada ahli- ahlinya.
- (4) Jawatankuasa Cawangan hendaklah terdiri daripada pemegang-pemegang jawatan seperti berikut:
 - (a) Ketua Cawangan;
 - (b) Timbalan Ketua Cawangan;
 - (c) Tidak lebih daripada tiga (3) Naib Ketua Cawangan, termasuk seorang dari Pergerakan Pemuda dan seorang lagi dari Pergerakan Wanita;
 - (d) Setiausaha Cawangan;
 - (e) Penolong Setiausaha Cawangan;
 - (f) Bendahari Cawangan;
 - (g) Penolong Bendahari Cawangan;
 - (h) Ketua Penerangan Cawangan;
 - (i) Penolong Ketua Penerangan Cawangan;
 - (j) Tiga (3) Ahli Jawatankuasa yang dilantik oleh Ketua Cawangan dengan persetujuan Cawangan; dan
 - (k) Tidak lebih daripada sembilan belas (19) orang ahli yang dipilih oleh Mesyuarat Perwakilan Cawangan dan tertakluk kepada Artikel 15(3), 15(4) dan 15(5) dan sehingga Mesyuarat Perwakilan Cawangan Tiga Tahun Sekali untuk membuat pemilihan.
- (5) Ahli-ahli yang memegang jawatan dalam **fasal** (4) (a), (b), (c) dan (k) diatas hendaklah dipilih oleh Mesyuarat Perwakilan Cawangan Tiga Tahun Sekali yang terdiri daripada perwakilan-

perwakilan Ranting dalam sesebuah Cawangan dan ahli-ahliyang layak menghadiri Mesyuarat Perwakilan Cawangan **dan jawatan dalam fasal (4)(a) tertakluk kepada Artikel 15(3).**

- (6) Setiausaha Cawangan, Bendahari Cawangan dan Ketua Penerangan Cawangan serta penolong-penolong mereka hendaklah dilantik oleh Ketua Cawangan sendiri dengan persetujuan Jawatankuasa Cawangan.
- (7) Jika seseorang ahli Jawatankuasa Cawangan (selain daripada Setiausaha Cawangan, Bendahari Cawangan dan Ketua Penerangan Cawangan) tidak lagi memegang jawatannya, maka Jawatankuasa Cawangan berkuasa untuk melantik penggantinya, dan pengganti itu hendaklah memegang jawatan sehingga Mesyuarat Perwakilan Cawangan Tiga Tahun Sekali yang akan datang diadakan.
- (8) Seseorang ahli Jawatankuasa Cawangan boleh memohon untuk diberhentikan daripada jawatannya dengan menyatakan sebab-sebabnya dalam surat permohonan berhenti kepada Setiausaha Cawangan. Setiausaha Cawangan hendaklah, setelah menerima surat permohonan itu, mengemukakan kepada Jawatankuasa Cawangan untuk pertimbangan.
- (9) Jika Ketua Cawangan berhenti atau diberhentikan, maka Timbalan Ketua Cawangan hendaklah memangku jawatan Ketua Cawangan itu dan jika Pemangku Ketua Cawangan berhenti atau diberhentikan maka Jawatankuasa Cawangan bolehlah melantik salah seorang daripada Naib-Naib Ketua Cawangan untuk memangku Jawatan Ketua itu dan jika ketiga-tiga Naib Ketua Cawangan berhenti atau diberhentikan, maka Jawatankuasa Cawangan bolehlah melantik salah seorang ahli Jawatankuasa Cawangan untuk memangku Jawatan Ketua Cawangan itu sehingga Mesyuarat Perwakilan Cawangan Tiga Tahun Sekali yang akan datang diadakan.
- (10) Jika dua pertiga atau lebih daripada ahli-ahli Jawatankuasa Cawangan meletakkan jawatan dengan serentak, maka Jawatankuasa Cawangan itu hendaklah dianggap telah terbubar dan ahli-ahlinya yang tinggal hendaklah, dalam tempoh tidak

lebih daripada tiga (3) bulan daripada tarikh perletakan jawatan beramai-ramai itu, mengadakan Mesyuarat Perwakilan Cawangan Khas untuk membentuk semula Jawatankuasa Cawangan dan Majlis Tertinggi berkuasa menentukan tempoh perkhidmatan Jawatankuasa Cawangan yang baru dibentuk itu.

- (11) Jika semua ahli Jawatankuasa Cawangan berhenti serentak maka Majlis Tertinggi hendaklah mengarahkan supaya Mesyuarat Perwakilan Cawangan Khas diadakan untuk membentuk semula Jawatankuasa Cawangan.
- (12) Tanggungjawab-tanggungjawab dan kuasa-kuasa Jawatankuasa Cawangan adalah seperti berikut:-
 - (a) Menyediakan manifesto bagi mana-mana Pilihan Raya serta membentuk dasar-dasar yang akan dilaksanakan.
 - (b) Mencadangkan kepada Majlis Tertinggi calon-calon bagi mana-mana Pilihan Raya.
 - (c) Mengawal, mengelola dan memutuskan apa-apa perkara berkenaan dengan mana-mana Pilihanraya.
 - (d) Menubuh dan mengawal perjalanan Ranting-Ranting dalam Cawangannya menurut Perlembagaan ini dan mengisytiharkan penubuhan Ranting-Rantingnya.
 - (e) Menghantar kepada Pendaftar Pertubuhan Penyata Tahunan pada tiap-tiap tahun menurut kehendak Akta Pertubuhan 1966 menerusi Majlis Tertinggi.
 - (f) Menghantar kepada Setiausaha Agung Penyata Tahunan Cawangan bagi tahun yang baru lepas berserta dengan Penyata Kira-kira yang telah diperiksa dan disahkan oleh Juruaudit yang dilantik oleh Mesyuarat Perwakilan Cawangan.
 - (g) Ahli-ahli Jawatankuasa boleh mencadang untuk melucutkan jawatan Ketua Cawangan atas alasan tertentu dan sama ada keputusan itu dibuat dalam mesyuarat ataupun dengan pengakuan bertulis tidak kurang daripada dua pertiga bilangan ahli Jawatankuasa Cawangan kepada Majlis

Tertinggi dan keputusan Majlis Tertinggi adalah muktamad, melainkan dirombak oleh Perhimpunan Agung.

- (h) Mencadangkan pemecatan atau penggantungan (suspension) seseorang ahli dalam Cawangan itu atau pembubaran (dissolution) Ranting kepada Majlis Tertinggi atas sebab-sebab tertentu.
- (i) Memilih ahli-ahli bagi mewakili Cawangan ke Perhimpunan Agung.
- (j) Mengiktiraf penubuhan Ranting-Ranting Parti dalam Cawangan dan menjaga supaya pekerjaannya menurut Perlembagaan Parti.
- (k) Menyelesaikan perselisihan-perselisihan yang berbangkit dalam sesebuah Ranting.
- (l) Memberhentikan mana-mana ahli Jawatankuasa Cawangan daripada jawatannya sekiranya didapati dia tidak menyempurnakan tugasnya dengan sempurna atau bertindak bertentangan dengan dasar-dasar Parti dengan mendapat persetujuan sekurang-kurangnya dua pertiga daripada jumlah ahli Jawatankuasa Cawangan dan Jawatankuasa Cawangan berkuasa melantik penggantinya.
- (m) Membentangkan kepada Mesyuarat Perwakilan Cawangan Tiga Tahun Sekali dalam satu laporan yang membutirkan pekerjaan dan kemajuan Cawangan itu bagi tempoh tiga (3) tahun yang lepas itu serta membentangkan laporan dan penyata kira-kira yang telah diperiksa dan disahkan oleh Juruaudit.
- (n) Menghantarkan kepada semua Ranting laporan tahunannya dan penyata kira-kira yang telah **diaudit**, sekurang-kurangnya empat belas (14) hari sebelum Mesyuarat Perwakilan Cawangan Tiga Tahun Sekali diadakan.
- (o) Menjalankan kehendak-kehendak **Perlembagaan** ini, sebarang peraturan dan tata tertib Parti, dan mengambil sebarang langkah-langkah yang **munasabah** atas arahan Majlis Tertinggi.

(13) Tanggungjawab Pemegang-pemegang Jawatan Cawangan.

(a) Ketua Cawangan

- (i) Ketua Cawangan hendaklah bertanggungjawab atas kesempurnaan perjalanan Cawangan dan Ranting-Ranting di bawahnya;
- (ii) Ketua Cawangan hendaklah bertanggungjawab memanggil dan mempengerusikan tiap-tiap Mesyuarat Jawatankuasa Cawangan dan bertanggungjawab menguruskan tiap-tiap mesyuarat itu dengan teratur;
- (iii) Ketua Cawangan hendaklah bertanggungjawab atas kesempurnaan perjalanan Pejabat Setiausaha Cawangan;
- (iv) Ketua Cawangan hendaklah menandatangani semua minit mesyuarat; dan
- (v) Ketua Cawangan hendaklah, sekiranya bilangan undi dalam satu-satu Mesyuarat Cawangan adalah sama banyak, mempunyai undi pemutus.

(b) Timbalan Ketua Cawangan

Timbalan Ketua Cawangan hendaklah membantu Ketua Cawangan dalam menjalankan tugasnya dan memangku jawatan Ketua Cawangan semasa ketiadaannya.

(c) Naib-Naib Ketua Cawangan

Naib-Naib Ketua Cawangan hendaklah membantu Ketua Cawangan dan Timbalan Ketua Cawangan dalam menjalankan tanggungjawab mereka dan salah seorang daripada Naib-Naib Ketua Cawangan hendaklah memangku jawatan Ketua Cawangan semasa ketiadaan Ketua Cawangan dan Timbalan Ketua Cawangan.

(d) Setiausaha Cawangan

- (i) Setiausaha Cawangan serta Penolong Setiausaha

Cawangan hendaklah bertanggungjawab mentadbir kerja-kerja Parti dalam Cawangan menurut **Perlembagaan** ini dan apa-apa peraturan Parti. Mereka hendaklah menjalankan arahan-arahan Perhimpunan Agung Majlis Tertinggi, Yang DiPertua, Setiausaha Agung dan Mesyuarat Perwakilan Cawangan;

- (ii) Setiausaha Cawangan dan Penolong Setiausaha Cawangan hendaklah bertanggungjawab menguruskan persuratan dan perhubungan serta menyimpan segala buku, dokumen dan surat-surat lain (kecuali buku kira-kira) mengenai Cawangan mereka;
 - (iii) Setiausaha bertanggungjawab secara langsung kepada Ketua Cawangan dalam pentadbiran pejabat Cawangan;
 - (iv) Bertanggungjawab **melaporkan** kepada Ketua Cawangan segala tindakan yang dijalankan berhubung dengan pentadbiran pejabat Cawangan;
 - (v) Bertanggungjawab atas persediaan apa-apa Mesyuarat Jawatankuasa Perwakilan Cawangan; dan
 - (vi) Menyediakan Penyata Tahunan yang menerangkan kerja-kerja dan kemajuan Cawangan dan menyerahkannya kepada Jawatankuasa Cawangan.
- (e) Bendahari Cawangan.
- (i) Bendahari Cawangan dan Penolong Bendahari Cawangan hendaklah bertanggungjawab dalam hal kewangan Parti;
 - (ii) Segala cek hendaklah ditandatangani oleh Bendahari Cawangan bersama-sama dengan pemegang jawatan lain dalam Cawangan seperti yang ditentukan oleh Jawatankuasa Cawangan; dan

- (iii) Bertanggungjawab menyediakan penyata kewangan Cawangan untuk diperiksa dan disahkan oleh Juruaudit sebelum dibentangkan kepada Jawatankuasa Cawangan.

(f) Ketua Penerangan Cawangan

Ketua Penerangan Cawangan hendaklah bertanggungjawab menguruskan hal-ehwal Penerangan tentang dasar-dasar dan tujuan-tujuan Parti kepada orang ramai dalam Cawangannya dengan syarat bahawa sebarang penerangan yang hendak dibuat hendaklah mendapat persetujuan Ketua Cawangan atau Jawatankuasa Cawangan terlebih dahulu.

(g) Ahli-Ahli Jawatankuasa Biasa Cawangan

Hendaklah membantu Jawatankuasa Cawangan di dalam menjalankan tugas-tugasnya.

ARTIKEL 19: PENUBUHAN, PENTADBIRAN DAN PENGURUSAN RANTING - RANTING

- (1) Sesebuah Ranting boleh ditubuhkan di mana-mana tempat dalam sesebuah Cawangan sebagaimana yang ditentukan oleh Jawatankuasa Cawangan dengan persetujuan tidak kurang daripada dua pertiga jumlah ahli Jawatankuasa Ranting atau Majlis Tertinggi.
- (2) Urusan tiap-tiap Ranting hendaklah dijalankan di bawah kuasa dan arahan Mesyuarat Agungnya, tetapi Mesyuarat Agung itu sendiri hendaklah tertakluk kepada Perlembagaan ini dan mana-mana peraturan Parti.
- (3) Mesyuarat Agung **Tiga Tahun Sekali** hendaklah diadakan pada masa, tarikh dan tempat yang ditetapkan oleh Jawatankuasa Ranting kecuali jika Jawatankuasa Cawangan menentukan tarikh yang berlainan tetapi tarikh itu tidak boleh lewat daripada tiga (3) bulan setelah tahun kewangannya berakhir pada tiap- tiap tahun yang **ketiga**.
- (4) Agenda Mesyuarat Agung Ranting **Tiga Tahun Sekali** ialah seperti berikut:-

- (a) Perutusan Ketua Ranting;
 - (b) Mengesahkan minit Mesyuarat Agung Ranting **Tiga Tahun Sekali** yang lalu dan membincangkan perkara-perkara yang berbangkit daripada minit tersebut;
 - (c) Menerima laporan Jawatankuasa Ranting berkenaan dengan kerja-kerja Ranting dalam **tempoh tiga (3)** tahun yang lalu;
 - (d) Menerima laporan Bendahari dan penyata kira-kira yang telah diaudit bagi **tempoh tiga (3)** tahun yang lalu;
 - (e) Memilih wakil-wakil ke Mesyuarat Perwakilan Cawangan untuk **tempoh tiga (3)** tahun yang akan datang;
 - (f) Memilih ahli-ahli Jawatankuasa Ranting dan Juruaudit-Juruaudit dalam untuk **tempoh tiga (3)** tahun yang akan datang; dan
 - (g) Membincangkan perkara-perkara lain yang telah dibentangkan di dalam Mesyuarat Agung Ranting.
- (5) Mesyuarat Agung Ranting khasnya bolehlah diadakan pada bila-bila masa:-
- (a) Jika diarah oleh Yang DiPertua, Jawatankuasa Cawangan atau Ketua Ranting;
 - (b) Jika diminta dengan bertulis dan disokong dengan sebab-sebab yang munasabah oleh sekurang-kurangnya satu pertiga daripada ahli-ahli Ranting; dan
 - (c) Jika diminta dengan bertulis oleh sekurang-kurangnya satu pertiga daripada ahli-ahli Jawatankuasa Ranting.
- (6) Mesyuarat Agung Ranting Khas yang diminta menurut **fasal (5)** (b) dan (c) hendaklah diadakan dalam tempoh tiga puluh (30) hari dan sekurang-kurangnya tujuh (7) hari notis hendaklah diberikan kepada ahli-ahlinya.

- (7) Mana-mana ahli yang menjadi Ahli Majlis Pihak Berkuasa Tempatan boleh menghadiri Mesyuarat Agung Ranting tetapi dia tidak berhak mengundi kecuali ia menjadi ahli Ranting berkenaan.
- (8) Mesyuarat Agung Ranting hanya sah dijalankan apabila dihadiri oleh tidak kurang daripada **separuh** bilangan keahlian Ranting atau dua kali ganda bilangan ahli Jawatankuasa Ranting, mengikut yang mana satu berkurang jumlah ahlinya dan sekurang-kurangnya tujuh (7) hari notis hendaklah diberikan kepada ahli-ahlinya.

ARTIKEL 20: JAWATANKUASA RANTING

- (1) (a) Jawatankuasa Ranting adalah merupakan badan yang bertanggungjawab untuk menjalankan pentadbiran Ranting di bawah kuasa dan perintah, Mesyuarat Agung Ranting.
(b) Jawatankuasa Ranting berkuasa menjalankan sebarang arahan Mesyuarat Agung Ranting dan segala tindakan akan dimaklumkan semasa Mesyuarat Agung Ranting.
- (2) Jawatankuasa Ranting hendaklah bermesyuarat sekurang-kurangnya tiga (3) bulan sekali atau apabila dikehendaki oleh Ketua Ranting ataupun atas permintaan bertulis daripada sekurang-kurangnya satu pertiga daripada ahli-ahli Jawatankuasa Ranting. Mesyuarat Jawatankuasa Ranting yang diminta oleh ahli-ahlinya hendaklah diadakan dalam tempoh dua puluh empat (24) hari dari tarikh permohonan bertulis itu dibuat.
- (3) Separuh daripada ahli-ahli Jawatankuasa Ranting adalah cukup bagi menjalankan mesyuaratnya dan sekurang-kurangnya tujuh (7) hari notis hendaklah diberi kepada semua ahli.
- (4) Jawatankuasa Ranting hendaklah terdiri daripada pemegang-pemegang jawatan seperti berikut:-

- (a) Ketua Ranting;
 - (b) Timbalan Ketua Ranting;
 - (c) Setiausaha Ranting;
 - (d) Penolong Setiausaha Ranting;
 - (e) Bendahari Ranting;
 - (f) Penolong Bendahari Ranting;
 - (g) Ketua Penerangan Ranting; dan
 - (h) Tidak lebih daripada sebelas (11) orang ahli yang dipilih oleh Mesyuarat Agung.
- (5) (a) Ketua Ranting, Timbalan Ketua Ranting dan ahli-ahli Jawatankuasa Ranting yang lain, kecuali mereka yang tersebut dalam **fasal** 5 (b) hendaklah dipilih di dalam Mesyuarat Agung daripada ahli-ahli Ranting.
- (b) Setiausaha Ranting, Bendahari Ranting, Ketua Penerangan Ranting dan Penolong-Penolong mereka hendaklah dilantik oleh Ketua Ranting dengan persetujuan Jawatankuasa Ranting.
- (6) Jika seseorang ahli Jawatankuasa Ranting tidak lagi memegang jawatannya, maka Jawatankuasa Ranting berkuasa melantik penggantinya dan pengganti itu hendaklah memegang jawatan sehingga Mesyuarat Agung **Tiga Tahun Sekali** yang akan datang diadakan.
- (7) (a) Seseorang ahli Jawatankuasa Ranting boleh memohon secara bertulis untuk berhenti daripada jawatannya dengan menyatakan sebab-sebab berhenti kepada Setiausaha Ranting.

- (b) Setiausaha Ranting hendaklah, setelah menerima surat permohonan itu, mengemukakan kepada Jawatankuasa Ranting untuk pertimbangan.
- (8) Di dalam tiap-tiap Mesyuarat Jawatankuasa Ranting, jika Ketua Ranting dan Timbalannya tidak hadir, ahli-ahli yang hadir hendaklah melantik salah seorang daripada mereka menjadi Pengerusi Mesyuarat.
- (9) Tugas-tugas, kuasa-kuasa dan tanggungjawab-tanggungjawab Jawatankuasa Ranting ialah seperti berikut:-
 - (a) Menjalankan perintah-perintah dari peringkat yang lebih tinggi;
 - (b) Melatih ahli supaya setia kepada Parti dan dasar perjuangannya;
 - (c) Menyemai semangat setia kawan dan menggalakkan budaya saling bantu-membantu di kalangan ahli Parti;
 - (d) Menimbang permohonan hendak menjadi ahli dan merujuk kepada Majlis Tertinggi melalui Cawangan termasuk permohonan hendak menjadi ahli daripada ahli yang sudah berhenti atau dipecat atau bekas ahli parti lain;
 - (e) Mencadang **calon-calon** yang akan bertanding dalam pilihanraya untuk pertimbangan pihak atasan Parti;
 - (f) Memberhentikan seseorang daripada menjadi ahli Jawatankuasa Ranting sekiranya didapati dia tidak menyempurnakan tugasnya dengan sempurna atau bertindak bertentangan dengan dasar-dasar Parti dan perlu mendapat persetujuan sekurang-kurangnya dua pertiga daripada jumlah ahli Jawatankuasa Ranting dan berkuasa melantik gantinya;

- (g) Membentangkan kepada Mesyuarat Agung **Tiga Tahun Sekali** satu laporan yang mengandungi aktiviti-aktiviti dan kemajuan Ranting bagi tempoh tiga (3) tahun yang lepas serta membentangkan laporan dan penyata kira-kira yang telah diperiksa dan disahkan oleh Juruaudit;
 - (h) Menghantarkan kepada ahli-ahli Ranting penyata tahunannya berserta penyata kira-kira sekurang-kurangnya empat belas (14) hari sebelum diadakan Mesyuarat Agung **Tiga Tahun Sekali**;
 - (i) Mencadangkan kepada Mesyuarat Agung sebarang pindaan kepada Perlembagaan ini atau kepada mana-mana peraturan dan membawa ke Mesyuarat Agung sebarang cadangan berkenaan dengan dasar atau rancangan kerja yang hendak dilaksanakan oleh Ranting mengikuti keadaan semasa atau perubahan siasah;
 - (j) Mencadangkan pemecatan atau penggantungan (suspension) seseorang ahli dan pembubaran Ranting kepada Majlis Tertinggi melalui Cawangan; dan
 - (k) Menjalankan peruntukan-peruntukan yang termaktub dalam Perlembagaan Parti.
- (10) Ketua Ranting
- (a) Ketua Ranting hendaklah bertanggungjawab -
 - (i) memanggil dan mempengerusikan tiap-tiap Mesyuarat Jawatankuasa Ranting dan menguruskannya dengan teratur; dan
 - (ii) atas kesempurnaan pengurusan dan pentadbiran Pejabat Setiausaha Ranting.
 - (b) Ketua Ranting hendaklah menandatangani minit tiap-tiap Mesyuarat Jawatankuasa Ranting atau Mesyuarat Agung Ranting.

- (c) Ketua Ranting mempunyai undi pemutus.
- (11) Timbalan Ketua Ranting
 - (a) Timbalan Ketua Ranting hendaklah membantu dan mewakili Ketua Ranting semasa ketiadaannya.
- (12) Setiausaha Ranting
 - (a) Setiausaha Ranting dan Penolong Setiausaha Ranting hendaklah bertanggungjawab mentadbir kerja-kerja Parti dalam Ranting mereka menurut Perlembagaan ini dan mana- mana peraturan Parti. Mereka hendaklah juga menjalankan arahan-arahan Perhimpunan Agung, Majlis Tertinggi, Yang DiPertua, Setiausaha Agung, Mesyuarat Perwakilan Cawangan dan Mesyuarat Agung Ranting.
 - (b) Setiausaha Ranting dan Penolong Setiausaha Ranting hendaklah bertanggungjawab menguruskan persuratan dan perhubungan serta menyimpan segala buku, dokumen dan surat-surat lain (kecuali buku kira-kira) mengenai Ranting mereka.
- (13) Bendahari Ranting
 - (a) Bendahari Ranting dan Penolong Bendahari Ranting hendaklah
 - (i) bertanggungjawab dalam hal kewangan Parti; dan
 - (ii) menyimpan buku kira-kira dan mencatat dengan betul di dalamnya segala pendapatan dan perbelanjaan Ranting.
 - (b) Semua cek hendaklah ditandatangani oleh Bendahari Ranting bersama-sama dengan pemegang jawatan yang lain dalam Ranting seperti yang ditentukan oleh Jawatankuasa Ranting.
 - (c) Bendahari bertanggungjawab menyediakan penyata kewangan Ranting untuk diperiksa oleh Juruaudit yang telah ditetapkan.

- (d) Bertanggungjawab membentangkan penyata kewangan yang telah diperiksa dan disahkan oleh Juruaudit.
- (14) Ketua Penerangan Ranting
 - (a) Ketua Penerangan Ranting hendaklah bertanggungjawab menyebarkan tentang dasar-dasar dan perkembangan terkini mengenai Parti kepada ahli dan masyarakat setempat.
- (15) Ahli-Ahli Jawatankuasa Biasa Ranting hendaklah membantu Jawatankuasa Ranting di dalam menjalankan tugas-tugasnya.

ARTIKEL 21: PERLANTIKAN PERWAKILAN

Seorang perwakilan bagi mana-mana peringkat perwakilan Parti tidaklah boleh mewakili lebih daripada satu pihak yang diwakilinya.

ARTIKEL 22: PERGERAKAN PEMUDA

- (1) Hendaklah diwujudkan Pergerakan Pemuda di setiap peringkat Parti dengan tujuan-tujuannya seperti berikut:-
 - (a) Menggalakkan ahli-ahlinya menceburkan diri dalam lapangan siasah, ekonomi, pelajaran, kebudayaan, kesenian dan sukan;
 - (b) Menggalakkan ahli-ahlinya bergiat cergas dalam aktiviti kemasyarakatan; dan
 - (c) Bekerjasama dengan badan-badan atau pergerakan-pergerakan lain yang berdaftar sepertimana yang dipersetujui oleh Majlis Tertinggi Parti.
- (2) Bagi mencapai tujuan-tujuan Pergerakan Pemuda, Majlis Tertinggi berkuasa membuat peraturan-peraturan tertentu dari semasa ke semasa yang tidak bercanggah dengan Perlembagaan ini.

ARTIKEL 23: PERGERAKAN WANITA

- (1) Hendaklah diwujudkan Pergerakan Wanita di setiap peringkat Parti, dengan tujuan-tujuan seperti berikut:-
 - (a) Menggalakkan ahli-ahlinya menceburkan diri dalam lapangan siasah, ekonomi, pelajaran, khasnya pelajaran urusan rumahtangga (Domestic Science), politik, sosial, kepimpinan, digital, keusahawanan, kebudayaan, kesenian dan kesukanan
 - (b) Menggalakkan ahli-ahlinya mengambil bahagian yang giat dalam lapangan kebajikan masyarakat; dan
 - (c) Bekerjasama dengan badan-badan atau pergerakan-pergerakan wanita lain yang berdaftar yang dipersetujui oleh Majlis Tertinggi.
- (2) Bagi mencapai tujuan-tujuan Pergerakan Wanita, Majlis Tertinggi berkuasa membuat peraturan-peraturan tertentu dari semasa ke semasa yang tidak bercanggah dengan Perlembagaan ini.

ARTIKEL 23A: PERGERAKAN BELIA PBB

- (1) Majlis Tertinggi berkuasa menubuhkan Pergerakan Belia PBB dalam semua peringkat Parti dan membuat peraturan-peraturan mengenainya.
- (2) Keanggotaan Pergerakan Belia PBB adalah merangkumi kesemua ahli biasa PBB sama ada lelaki atau perempuan yang berumur 18 tahun hingga 28 tahun.
- (3) Tujuan penubuhan Pergerakan Belia PBB adalah seperti berikut: -
 - a) Menggalakkan ahli-ahlinya menceburkan diri dalam lapangan siasah, ekonomi, pelajaran, kebudayaan, kesenian dan sukan;
 - b) Menggalakkan ahli-ahlinya bergiat cergas dalam aktiviti kemasyarakatan;

- c) Bekerjasama dengan badan-badan atau pergerakan-pergerakan lain yang berdaftar sepertimana yang dipersetujui oleh Majlis Tertinggi Parti.
- (4) Bagi mencapai tujuan-tujuan penubuhan Pergerakan Belia PBB, Majlis Tertinggi berkuasa membuat peraturan-peraturan tertentu yang difikirkan sesuai dan perlu dari semasa ke semasa yang tidak bercanggah dengan Perlembagaan ini.

ARTIKEL 24: SYARAT MENJADI CALON

- (1) Seseorang ahli tidak boleh menjadi **calon** dalam mana-mana Pilihan Raya atau Pilihan Raya Kecil:-
 - (a) Jika dia belum cukup **tiga (3)** tahun menjadi ahli kecuali diputuskan oleh Majlis Tertinggi;
 - (b) Jika dia telah keluar dan masuk kembali menjadi ahli selama **tempoh** yang ditetapkan oleh Majlis Tertinggi; dan
 - (c) Jika dia ditegah menjadi **calon** oleh mana-mana undang-undang yang berkuatkuasa.

ARTIKEL 25: DISIPLIN PARTI

- (1) Semua ahli hendaklah cintakan Parti dalam amalan:-
 - (a) patuh kepada Perlembagaan Parti dan Peraturan-Peraturan Parti dan Tataetika Keahlian Parti;
 - (b) mengikut perintah Parti;
 - (c) menjalankan dasar dan rumusan Parti;
 - (d) patuh dan menghormati keputusan Parti;
 - (e) menjaga rahsia Parti;

- (f) memelihara nama baik Parti; dan
 - (g) sentiasa menunjukkan tatasusila yang sopan dan tertib.
- (2) Majlis Tertinggi berkuasa menubuhkan Jawatankuasa Disiplin yang terdiri daripada ahli-ahli Parti yang pada pendapat Majlis Tertinggi berkeelayakan dan tidak mempunyai kepentingan dan menentukan peraturan-peraturan, kuasa-kuasanya dan boleh mengenakan hukuman kerana melanggar peruntukan Perlembagaan Parti dan kesalahan-kesalahan lain yang disenaraikan di dalam Tataetika Keahlian atau mana-mana peraturan lain.
- (3) (a) Mana-mana ahli yang melanggar peruntukan Perlembagaan Parti, Peraturan-peraturan Parti atau Tataetika Keahlian hendaklah dilaporkan oleh Jawatankuasa Cawangan, Jawatankuasa Ranting atau mana-mana ahli secara bertulis kepada Majlis Tertinggi.
- (b) Majlis Tertinggi hendaklah merujuk laporan serta aduan bertulis yang diterima dari Jawatankuasa Cawangan, Jawatankuasa Ranting atau mana-mana ahli kepada Jawatankuasa Disiplin yang seterusnya akan mengambil tindakan menyiasat dan mendengar aduan dan seterusnya membuat keputusan selaras dengan Artikel 25(4) Perlembagaan Parti.
- (4) Mana-mana ahli yang melanggar peruntukan Perlembagaan Parti atau Tataetika Keahlian boleh dikenakan mana-mana hukuman seperti berikut:-
- a) diberi amaran;
 - b) digantung haknya dalam Parti;
 - c) dilarang daripada bertanding bagi mana-mana jawatan dalam Parti ataupun sebagai calon dalam pilihanraya Negeri atau Umum bagi satu tempoh masa yang ditentukan oleh Majlis Tertinggi;

- d) dipecat daripada Parti; dan
 - e) dikenakan mana-mana hukuman yang difikirkan wajar.
- (5) Seseorang ahli atau pihak yang tidak puas hati dengan tindakan disiplin yang dikenakan keatasnya bolehlah merayu kepada Majlis Tertinggi dan keputusan Majlis Tertinggi adalah muktamad melainkan dipinta oleh keputusan Perhimpunan Agung.
- (6) (a) Seseorang ahli tidak boleh menuntut, mencabar, merayu, minta diulangkaji atau mempersoalkan di Mahkamah sebarang keputusan atau perkara-perkara lain berkaitan dengan hak, tugas, kepentingan, kewajipan atau tanggungan melainkan jika soal itu telah terlebih dahulu dibincangkan dan diputuskan oleh Majlis Tertinggi atau Perhimpunan Agung.
- (b) Mana-mana Ahli yang melanggar peruntukan **fasal** ini adalah dengan sendirinya terpecat daripada menjadi ahli.
- (c) Seseorang ahli berhak membuat rayuan terhadap apa-apa soal atau perkara kepada Setiausaha Agung secara bertulis dan Setiausaha Agung adalah dikehendaki menyelesaikan soal itu menurut **fasal** (7).
- (7) (a) Mana-mana ahli yang tidak berpuas hati dengan keputusan yang telah dibuat oleh mana-mana Jawatankuasa Ranting, Jawatankuasa Cawangan, Majlis Tertinggi atau mana-mana Mesyuarat yang menyentuh hak-hak kepentingannya atau kepentingan Parti berhak membuat rayuan bertulis kepada Setiausaha Agung supaya permasalahan yang diajukan dapat diselesaikan.
- (b) Tiap-tiap rayuan yang dibuat hendaklah dikemukakan dalam tempoh empat belas (14) hari dari tarikh penyampaian keputusan mengenai perkara yang berbangkit dengan memberi alasan tertentu.

- (c) Setiausaha Agung apabila menerima rayuan secara bertulis itu hendaklah dalam tempoh empat belas (14) hari dari tarikh penerimaan rayuan mengambil tindakan dengan merujuk kepada Jawatankuasa Ranting, Jawatankuasa Cawangan yang berkenaan atau kepada Majlis Tertinggi atau Perhimpunan Agung bergantung kepada pentingnya soal itu.
 - (d) Jawatankuasa Ranting atau Jawatankuasa Cawangan yang dirujuk soal itu hendaklah membuat keputusan dalam tempoh tiga puluh (30) hari dari tarikh penerimaan soal itu dari Setiausaha Agung.
 - (e) Pihak yang masih tidak berpuas hati dengan keputusan Jawatankuasa Ranting, Jawatankuasa Cawangan, boleh dalam tempoh empat belas (14) hari dari tarikh penerimaan keputusan itu merayu secara bertulis kepada Majlis Tertinggi yang berkuasa mengesahkan, mengenyahkan atau mengubah keputusan itu atau merujuknya kepada Perhimpunan Agung untuk memutuskannya dan keputusan Majlis Tertinggi adalah muktamad melainkan jika keputusan itu dipinda oleh Perhimpunan Agung.
 - (f) Dengan syarat bahawa Majlis Tertinggi hendaklah membuat keputusannya dibawah **fasal** (7) (e) dalam tempoh enam puluh (60) hari dari tarikh penerimaan surat rayuan itu.
- (8) Majlis Tertinggi berkuasa membuat peraturan-peraturan yang difikirkan sesuai dan perlu, berkaitan dengan disiplin dan Tataetika ahli PBB yang di antara lain melarang penyalahgunaan kuasa atau politik wang dengan tujuan mendapat undi atau sokongan atau untuk mempengaruhi mana-mana pemilihan bagi pihak lain atau supaya jangan mengundi mana-mana orang dalam mana-mana pemilihan Parti.
- (9) Bagi maksud **fasal** (6) dan (7), perkataan “Ahli” termasuklah Ranting dan Cawangan dan mana-mana Jawatankuasa bagi kedua-duanya.

ARTIKEL 26: BUKU DAFTAR KEAHLIAN

- (1) Tiap-tiap peringkat Pejabat Setiausaha hendaklah menyimpan Buku Daftar Keahlian;

- (2) Majlis Tertinggi berkuasa membuat sebarang peraturan berkenaan dengan pendaftaran Keahlian.

ARTIKEL 27: KAD KEAHLIAN

- (1) Tiap-tiap ahli hendaklah mempunyai Kad Keahlian.
- (2) Kad Keahlian hendaklah dikeluarkan oleh Ibu Pejabat Parti.
- (3) Majlis Tertinggi berkuasa membuat sebarang peraturan berkenaan Kad Keahlian.

ARTIKEL 28: SUMBER KEWANGAN

- (1) Sumber kewangan Parti ini adalah seperti berikut:-
 - (a) Yuran-yuran;
 - (b) Derma-derma; dan
 - (c) **Ikhtiar-ikhtiar** lain yang dijalankan oleh mana-mana Jawatankuasa dengan persetujuan Majlis Tertinggi.
- (2) Tahun kewangan hendaklah bermula dari satu (1) haribulan Januari hingga tiga puluh satu (31) haribulan Disember.
- (3) Setiausaha Ranting dan Setiausaha Cawangan hendaklah menghantar kepada Setiausaha Agung penyata tahunan masing-masing termasuk penyata kira-kira yang telah diperiksa dan disahkan oleh Juruaudit.
- (4) Tertakluk kepada peruntukan-peruntukan yang terkandung di dalam Perlembagaan ini, wang Parti bolehlah digunakan untuk sebarang kepentingan Parti dan bagi menjalankan tujuan-tujuan Parti termasuk perbelanjaan pentadbiran bayaran gaji, elaun dan perbelanjaan-perbelanjaan lain kepada mana-mana pemegang jawatan dan pekerja-pekerja Parti dan juga perbelanjaan memeriksa kira-kira, jika pemeriksaan kira-kira dibuat oleh firma akauntan luar.

ARTIKEL 29: YURAN

- (1) Tiap-tiap ahli hendaklah membayar kepada Bendahari Ranting sebanyak satu ringgit (RM1.00) pada tiap-tiap tahun.
- (2) (a) Seseorang ahli yang menjadi Ahli Dewan Negara, Ahli Dewan Rakyat, Ahli Dewan Undangan Negeri atau seseorang ahli yang memegang jawatan yang ditentukan oleh Majlis Tertinggi hendaklah membayar satu BAYARAN BULANAN sebanyak yang ditetapkan oleh Majlis Tertinggi.

(b) Jika seseorang ahli yang ditentukan itu didapati ingkar membuat pembayaran kepada Parti maka Majlis Tertinggi berkuasa mengambil apa-apa tindakan ke atasnya walaupun terpaksa memecat atau menggantungkannya daripada menjadi ahli.
- (3) Yuran yang dikutip menurut **fasal** (1) boleh dibahagikan kepada Cawangan-Cawangan dan Ranting-Ranting mengikut ketetapan Majlis Tertinggi.
- (4) Tertakluk kepada **fasal** (6), jika seseorang ahli tidak menjelaskan yuran tahunannya sebelum satu (1) haribulan April tanpa apa-apa sebab yang munasabah, maka dia tidaklah boleh menggunakan haknya sebagai seorang ahli sehinggalah yurannya dijelaskan.
- (5) Tahun Yuran yang dimaksudkan dalam **Artikel** ini adalah sama dengan tempohnya tahun kewangan yang ditetapkan dalam **Artikel** 28 (2).
- (6) Majlis Tertinggi berhak memberi pengecualian pembayaran yuran selama tempoh yang tertentu kepada ahli-ahli Parti.

ARTIKEL 30: PERUNTUKAN KEWANGAN

- (1) Tiap-tiap peringkat Bendahari boleh menyimpan wang tunai sebanyak amaun tidak lebih daripada satu ratus ringgit (RM100.00) pada satu-satu masa. Semua wang yang lebih daripada amaun itu hendaklah disimpan dalam bank (atau di

tempat lain) yang ditetapkan oleh Majlis Tertinggi dalam masa tujuh (7) hari dari tarikh wang itu diterima, dan akaun simpanan hendaklah atas nama Parti, Cawangan atau Ranting yang berkenaan.

- (2) Cek-cek atau borang-borang mengeluarkan wang hendaklah ditandatangani oleh sekurang-kurangnya dua (2) orang pemegang jawatan termasuk tiap-tiap peringkat Bendahari yang diberi kuasa oleh Majlis Tertinggi atau oleh mana-mana Jawatankuasa Cawangan atau Ranting.
- (3)
 - (a) Jawatankuasa Cawangan adalah berhak ke atas semua harta benda, wang tunai di tangan ataupun simpanan dalam Bank atau simpanan di Pejabat Pos bagi sesebuah Ranting yang telah dibubar.
 - (b) Majlis Tertinggi berhak dan berkuasa ke atas semua wang dan harta benda Cawangan-Cawangan yang telah dibubar.
- (4)
 - (a) Dengan seberapa segera yang mungkin, setelah berakhirnya tahun kewangan, suatu penyata kira-kira dan kunci kira-kira bagi tiap-tiap tahun yang lalu hendaklah disediakan dan diaudit oleh Juruaudit yang telah dilantik menurut Perlembagaan ini.
 - (b) Penyata kira-kira bagi tiap-tiap peringkat yang telah diaudit hendaklah dibentang untuk disahkan oleh Persidangan Perhimpunan Agung, Mesyuarat Perwakilan Cawangan atau Mesyuarat Agung Ranting yang akan datang.
 - (c) Salinan penyata kira-kira yang telah diaudit hendaklah dipamerkan untuk makluman ahli-ahli di Pejabat Berdaftar Parti bagi penyata kira-kira Ibu Pejabat. Dan di peringkat Cawangan atau Ranting, penyata kira-kira hendaklah dipamerkan di Pejabat Setiausaha masing-masing.
- (5) Majlis Tertinggi berkuasa membuat sebarang peraturan berkenaan dengan semua kewangan Parti ini bagi semua peringkat, termasuk Pergerakan Pemuda dan Pergerakan Wanita dan mengambil alih wang-wang itu jika didapati perlu.

ARTIKEL 31: HARTA TAK ALIH

- (1) Tiap-tiap harta tak alih iaitu tanah atau bangunan kepunyaan Parti hendaklah didaftarkan atas nama Parti dan harta tak alih yang dimiliki oleh Cawangan dan Ranting adalah merupakan harta kepunyaan bersama Parti.
- (2) (a) Kuasa untuk menentukan Parti membeli harta tak alih, mencagar, menjual, memindah, memajakkan atau menyewakan harta tak alih kepunyaannya adalah ditentukan oleh, dan terletak di bawah kuasa Perhimpunan Agung.
(b) Kuasa yang sama untuk melakukan perkara-perkara dalam **fasal 2 (a)** mengenai harta tak alih kepunyaan Cawangan dan Ranting adalah terletak pada Jawatankuasa Cawangan dan Jawatankuasa Ranting masing-masing, setelah mendapat kebenaran daripada Majlis Tertinggi.
- (3) (a) Tiga (3) pegawai yang terdiri daripada pemegang-pemegang jawatan dan berusia lebih daripada dua puluh satu (21) tahun hendaklah **dilantik** di dalam Perhimpunan Agung Tiga Tahun Sekali bagi maksud Seksyen 9 (b) Akta Pertubuhan, 1966.
(b) Tiga Pegawai tersebut hendaklah memegang jawatan sehingga berakhir di Perhimpunan Agung Tiga Tahun Sekali yang akan datang.
- (4) (a) Pegawai-pegawai yang dilantik di bawah **fasal (3)** hendaklah menguruskan harta tak alih Parti sebagaimana yang dikehendaki oleh Perhimpunan Agung, tetapi semua harta tak alih kepunyaan Parti hendaklah didaftar atas nama Parti.
(b) Pegawai-pegawai yang dilantik tidak boleh menjual, menarik balik, atau menukarkan harta kepunyaan Parti tanpa persetujuan dan kuasa yang diberikan oleh Perhimpunan.
- (5) Seorang pegawai boleh dilucutkan daripada jawatannya oleh Perhimpunan Agung, atas perakuan, oleh sebab uzur kerana sakit, tidak siuman, tidak berada didalam Negeri atau apa-apa sebab yang menyebabkan dia tidak boleh menjalankan tugasnya atau pekerjaannya tidak memuaskan. Jika berlaku kematian,

perletakan jawatan atau pembuangan bagi seorang pegawai yang diperakukan itu sebelum Perhimpunan Agung Tiga Tahun Sekali, maka kekosongan itu bolehlah dipenuhi oleh Perhimpunan Agung Khas yang diadakan untuk tujuan tersebut.

ARTIKEL 32: AUDIT

- (1) Perhimpunan Agung Tiga Tahun sekali hendaklah melantik dua (2) orang Juruaudit yang bukannya pemegang-pemegang jawatan Parti untuk memeriksa Penyata Kira-Kira Parti dan mereka akan berkhidmat dari satu Perhimpunan Agung Tiga Tahun Sekali hingga Perhimpunan Agung Tiga Tahun sekali yang akan datang.
- (2) Juruaudit-Juruaudit adalah dikehendaki memeriksa Penyata Kira-Kira Parti bagi tiap-tiap tahun, dan membuat laporan atau pengesahan untuk Perhimpunan Agung. Mereka harus juga dikehendaki pada bila-bila masa oleh Yang DiPertua memeriksa Penyata Kira-Kira Parti di dalam tempoh jawatan mereka dan membuat laporan kepada Majlis Tertinggi.
- (3) Semua peringkat Parti hendaklah mengambil tindakan serupa berhubung dengan perlantikan dan pemeriksaan penyata kira-kira peringkat masing-masing dan peruntukan **fasal** (1) dan (2) hendaklah diikuti sejauh mana yang sesuai.
- (4) Majlis Tertinggi berkuasa membuat sebarang peraturan berkenaan dengan pemeriksaan Penyata Kira-Kira Parti di semua peringkat.

ARTIKEL 33: PERATURAN-PERATURAN

Majlis Tertinggi berkuasa membuat sebarang peraturan bagi melicinkan jentera pentadbiran Parti termasuk peraturan-peraturan melibatkan Perhimpunan Agung, Mesyuarat Perwakilan Cawangan dan Mesyuarat Agung Ranting serta Pergerakan Pemuda, Pergerakan Wanita dan Pergerakan Belia PBB asalkan sebarang peraturan itu tidak bercanggah dengan Perlembagaan ini

ARTIKEL 34: PINDAAN PERLEMBAGAAN

- (1) Perlembagaan ini atau mana-mana bahagian daripadanya boleh dipinda ataupun dimansuhkan melalui suatu ketetapan yang dipersetujui oleh suara ramai daripada bilangan perwakilan dan ahli-ahli yang layak hadir dalam Perhimpunan Agung.
- (2) Sesuatu usul untuk meminda atau memansuhkan mana-mana bahagian Perlembagaan ini hendaklah dihantar kepada Setiausaha Agung mengikut syarat-syarat yang ditetapkan di dalam peraturan-peraturan Mesyuarat dalam tempoh masa tidak kurang daripada dua puluh satu (21) hari dari tarikh Perhimpunan Agung Tiga Tahun Sekali diadakan.
- (3) Perubahan-perubahan atau pindaan-pindaan kepada Perlembagaan ini hanya boleh dikuatkuasakan mulai daripada tarikh perubahan-perubahan dan pindaan-pindaan itu diluluskan oleh Pendaftar Pertubuhan.

ARTIKEL 35: PUNGUTAN SUARA (REFERENDUM)

Tanpa tertakluk kepada mana-mana peruntukan dalam Perlembagaan ini, Majlis Tertinggi berkuasa mendapatkan sesuatu keputusan mengenai sesuatu hal yang penting dengan cara pungutan suara.

ARTIKEL 36: PEMBUBARAN, PERCANTUMAN DAN LAIN-LAIN

- (1) Parti ini boleh dibubarkan, bercantum, bergabung ataupun masuk dalam suatu perikatan dengan mana-mana parti politik lain yang mempunyai tujuan yang lebih kurang sama dengan Parti ini.
- (2) Pembubaran, percantuman, pergabungan atau perikatan bolehlah diselesaikan dengan salah satu cara seperti berikut:-
 - (a) melalui suatu ketetapan yang dipersetujui oleh tidak kurang daripada setengah perwakilan dan ahli-ahli yang layak hadir di Perhimpunan Agung.
 - (b) dengan persetujuan oleh tidak kurang daripada separuh bilangan Ranting.

- (c) dengan persetujuan tidak kurang daripada lima puluh satu peratus (51%) daripada sekalian keahlian Parti.
- (3) Bila mana Parti dibubarkan atau bercantum maka hutang piutang Parti dan baki wang yang ada hendaklah diselesaikan dan segala harta yang ada hendaklah diselenggara menurut ketetapan yang diperolehi di bawah **fasal** (2) di atas.
- (4) Notis mengenai pembubaran Parti ini hendaklah dimaklumkan kepada Pendaftar Pertubuhan dalam tempoh 14 hari daripada tarikh pembubarannya.
- (5) Majlis Tertinggi boleh membubarkan Cawangan, jika Cawangan berkenaan tidak mematuhi Perlembagaan Parti atau keputusan Perhimpunan Agung atau Majlis Tertinggi atau jika Cawangan didapati bersalah oleh Majlis Tertinggi atas perbuatan yang merosakkan Parti.
- (6) Keputusan membubarkan Cawangan hendaklah dengan undi terbanyak di dalam Majlis Tertinggi dengan syarat sebelum diambil keputusan membubarkan Cawangan dengan sebab yang tersebut di bawah **Artikel** ini Cawangan yang berkenaan hendaklah diberi notis tiga puluh (30) hari terlebih dahulu dan diberi peluang untuk menjawab tuduhan-tuduhan.
- (7) Perintah pembubaran hendaklah ditandatangani oleh Setiausaha Agung. Kegiatan Cawangan tidak boleh dijalankan mulai dari tarikh penerimaan perintah pembubaran itu kecuali kerana urusan yang ada kaitan dengan pembubaran. Mana- mana Cawangan yang tidak berpuas hati dengan perintah pembubaran itu boleh melalui notis bertulis kepada Setiausaha Agung di dalam tempoh tiga puluh (30) hari daripada tarikh penerimaan perintah pembubaran itu, membuat rayuan kepada Perhimpunan Agung. Walaupun rayuan telah dibuat namun perintah pembubaran masih berjalan kuatkuasanya sehingga ia dibatalkan, tetapi di dalam keadaan yang sedemikian Majlis Tertinggi boleh melantik suatu jawatankuasa pengurus yang terdiri daripada ahli-ahli untuk menguruskan hal-hal Cawangan itu sementara menanti rayuan dipertimbangkan.

- (8) Jika sesuatu Cawangan ditutup kerana sebab di bawah **Artikel** ini, maka Majlis Tertinggi berkuasa mengarahkan jawatankuasa pengurus mengambilalih pentadbiran dan pengurusan sesebuah Cawangan.
- (9) Pembubaran sesebuah Ranting adalah sama caranya dengan pembubaran sesebuah Cawangan dan Majlis Tertinggi berkuasa membuat apa-apa peraturan mengenai perkara ini.

ARTIKEL 37: PENTAFSIRAN

- (1) Dalam Perlembagaan ini:-
 - (a) “Cawangan” ertinya satu kawasan yang persempadannya suatu kawasan Dewan Undangan Negeri.
 - (b) “**Bumiputera**” ertinya suku-suku bangsa yang dianggap sebagai penduduk asli dalam Sarawak.
- (2) Jika berbangkit apa-apa perselisihan faham tentang pentafsiran Perlembagaan ini atau mana-mana Peraturan-Peraturan yang dibuat di bawah kuasanya, maka pentafsiran yang diberi oleh Majlis Tertinggi adalah muktamad melainkan dirombak oleh keputusan Perhimpunan Agung.

ARTIKEL 38: PERUNTUKAN-PERUNTUKAN UMUM MENGENAI CAWANGAN, RANTING, PERGERAKAN PEMUDA, PERGERAKAN WANITA DAN PERGERAKAN BELIA PBB

- (1) Sekiranya peruntukan-peruntukan khas tiada disebut dalam Perlembagaan ini bagi perkara-perkara berkaitan dengan pentadbiran dan pengurusan mana-mana Cawangan, Ranting dan Pergerakan Pemuda, Pergerakan Wanita atau Pergerakan Belia PBB, peruntukan- peruntukan yang berkenaan mengenai pentadbiran dan pengurusan Majlis Tertinggi dan Perhimpunan Agung hendaklah diikuti setakat mana yang sesuai

- (2) Perhimpunan Agung atau Majlis Tertinggi berkuasa membuat apa-apa peraturan atau memberikan apa-apa arahan kepada mana-mana peringkat bawahan mengenai pentadbiran dan pengurusan mana-mana peringkat Parti DENGAN SYARAT bahawa Perhimpunan Agung atau Majlis Tertinggi berkuasa membuat apa-apa peraturan atau memberikan apa-apa arahan kepada mana-mana peringkat parti selagi tidak bercanggah dengan peruntukan Perlembagaan ini.

ARTIKEL 39: PERUNTUKAN-PERUNTUKAN KHAS

- (1) Semua ahli Majlis Tertinggi, Jawatankuasa Cawangan, Jawatankuasa Ranting dan setiap pegawai yang menjalankan tugas-tugas pemerintah dalam Parti ini hendaklah terdiri daripada warganegara Malaysia.
- (2) Tiap-tiap ahli, pekerja, penasihat atau Penaung Parti hendaklah terdiri daripada warganegara Malaysia.
- (3) Parti tidak boleh memperoleh atau menerima wang atau harta-harta lain dari mana-mana punca asing tanpa terlebih dahulu mendapat kebenaran daripada Pendaftar Pertubuhan.
- (4) Mana-mana orang tidak boleh memegang jawatan Parti atau menjadi pekerja Parti jika dia telah hilang kelayakan untuk berbuat demikian menurut Seksyen 9A Akta Pertubuhan, 1966.

ARTIKEL 40: TARIKH KUATKUASA PERLEMBAGAAN

Perlembagaan ini hanya berkuatkuasa mulai dari tarikh ia diluluskan oleh Pendaftar Pertubuhan Malaysia.

.....
**YAB Datuk Patinggi Tan Sri (Dr) Abang Haji Abdul
Rahman Zohari bin Tun Datuk Abang Haji Openg**
Yang DiPertua PBB

.....
**YB Dato Sri Alexander
Nanta Linggi**
Setiausaha Agung PBB